

حكاية حب

محمد أكرم

حكاية حب

محمد اكرم

تدقيق لغوي : عبدالله أبو الوفا

تصميم الغلاف : عيبر محمد

رقم ايداع: 2984/2019

ترقيم دولي: 978-977-6594-77-7

دار فصلة للنشر والتوزيع
العزيزيه - منيا القمح - مصر
٠١٠٦٧٠٠٠٧٠١

fasla.pub@gmail.com

FB .Com/Fasla .Pub



جميع حقوق الطبع و النشر محفوظة الطبعة الأولى اكتوبر ٢٠١٩



جميع حقوق النشر محفوظة لدار فصلة للنشر و التوزيع
إن أي تصوير أو اعادة طباعه أو نشر بشكل ورقي أو الكتروني أو
ترجمته أو تسجيله صوتيا بدون إذن كتابي مسبق من الدار يعرض
صاحبه للمسائلة القانونية

حكاية حب

محمد اكرم



فصلة

للنشر والتوزيع

Fasla Publishing & Distribution



////////

إهداء

للمجروحين...المكسورين...الي بيكوا في نص الليل...الي قلبهم مكسور....
متزعلوش...انتوا مش لوحكم...ابتسموا و اضحكوا...روحكم اهم...حافظوا
عليها

جدي كان بالنسبالي سندي و ضهري و كنت دايمًا بحتاج نصيحتته و عمر نصيحتته ما خيبت... كان دايمًا يناديني بأبني... بس دايمًا كنت بحس انه جدي شاف كثير و انه جواه جروح كثير اوي يمكن الي عدي بيه كان السبب بس ضحكته علي قد ما بتبسطني علي قد ما هي مخبيه وجع و هم و حزن و في عيد ميلاد جدي الثمانين قعدني جنبه و قاللي انت دلوقتي عندك ١٨ سنه و اكيد عدي و هيعدي عليك حاجات كثير اوي و الحياه يا ابني تجارب و خبرات و انا شفت كثير اوي و هاحكيلك خبرتي و حياتي كلها يمكن تنفعك في حياتك و بدا جدي يحكي لي و قاللي انا هافتحك قلبي و هتسمع كل حاجه ممكن تكون أول مره تسمعها مني بس علشان تتعلم و تفهم الدنيا قد ايه بتهدك و تبنيك و تديك الفرصه و تاخذها منك و بدأ يحكي

اللي ميكونش معاك وقت ضعفك ميستاهلش حبك ووجودك انت هتكون
أقوي لوحديك

كنا لسه في طنطا و كنت لسه طفل صغير عندي ١٠ سنين و كانت هي ساكنه في العمارة الي قدامنا اسمها أروي...عيونها واسعه..شعر قصير..ضحكه بريئه تهبل.....لما تطلع من البلكونه كان قلبي يطير كنت دايمًا بفرح لما بشوفها و فرحت اكثر لما مامتي جت قالتلي انه اتعرفت علي جيران في العمارة الي قدامنا...عندهم بنت.... و في اول مره تزورنا عرفت انها البنت..و عرفت اسمها يومها..كنت فرحان كأني جايلي طقم و لعبه جديده.... تزورنا و سلمت عليها و اتكسفت و دخلت اوضتي.... اروي بقت معايا في نفس المدرسه...طلعت الباص اول يوم بابتسامه و شعرها قصير كان شكلها تجنن.....دخلت قعدت في الكرسي الي جنبي و ضحكتلي....انا فضلت باصص ليها طول الطريق كان اول مره احس انه طريق المدرسه قصير و انه مكنش كفايه انه اتفرج علي جمال أروي و بس.....أروي معايا في نفس الفصل و دي حاجه تخليني اسعد حد في الدنيا...كانت شاطره و جميله كل ولاد الفصل كان نفسهم يكلموها من اول يوم.....في الفسحه رحت كلمتها

-ازيك يا أروي

= الحمد لله و انت

-الحمد لله نورتي الفصل

= هههه شكرا

و مشيت يمكن ده اقصر كلام يتقال من واحد بيحب واحده بس انا كنت مكسوف و مكنتش اقدر اقول اكثر من كده عدت الايام و بقيت انا و أروي صحاب و بنذاكر سوا....بقي بينا الألفه لكن مش ألفه حب ممكن ألفه اخوات

و صحاب و لكن كل يوم حبها جوة قلبي بيكبر و بتكون مهمه اوي عندي بس هي شيفاني اخ و بس....مفيش حاجه ثانيه تربطنا...بس اروي كانت من البنات الي تسحرك بنظرة...بس متخلكش تقرب منها...تفضل تتمناها و متوصلش. تكون علي الشط و متقدرش تنزل تعوم....مع أولي ثانوي...جالنا ولد جديد الفصل....كنت حاسس انه من النوع الي يعجبها...ملوش غمط...مختلف عننا..حد كده غيرنا...و فعلا أروي بدأت تكلمه تقرب منه بطريقه غريبه يارب متكونش حبه...للأسف اروي جت في يوم و قالتلي انها بتحبه....انا اتصدمت سكت...شايفها و هي بتقرب منه و هو كمان...ارتبطوا سوا...بقيت انا مجرد حد هي بتحكيه انها فرحانه مبسوطه اول حب في حياتها اول كل حاجه حساها معاه..اول خروجه ليهم سوا..أول فيلم سينما يتفرجوا عليه سوا...أول مره يقولها بحبك....و انا بتقطع بموت مبعملش حاجه بموت بالبطئ و بس.... كان خلاص الدنيا بالنسبالي سوده....ملهاش لازمه..و كأن الدنيا مبتديش الحزن غير جرعه واحده..رحنا فرح لقرايينا في القاهره...كان قلبي مقبوض بلاسبب..يمكن علشان الشبوره..أو بروده الجو لأنه احنا في شهر واحد..أو يمكن علشان اول مرة اسافر من غير أيمن اخويا لأنه عنده مذاكره كثير..بس و احنا راجعين علي الطريق...حصل الي قلبي كان مقبوضه فعلا...اتوبيسين بيزنقوا علي بعض...معرفش ليه والدي قرر يعدي واحد منهم مع انها مش عادته..و كأنه كان عارف انه هيموت فقرر يروح بسرعه....الاتوبيس زنق علينا...والدي مقدرش يسيطر علي العربيه...العربيه دخلت في كتله اسمنت كانت علي جنب الطريق....يمكن مش فاكر حاجه مش فاكر ايه الي حصل...غير اني فوقت في مستشفى متجسس...و أيمن جنبي لابس أسود...مقدرتش استوعب حاولت و معرفتش...كان موتهم بالنسبالي اخر الدنيا...قررت انعزل عن الناس.

..اخويا ايمن حاول يخرجني و يساعديني..لحد ما بدأت واحده واحده افوق..
أنزل للناس اكمل حياتي...و شفت أروي لأول مرة بعد الحادثه...مجاش في بالي
ساعتها هي ليه معزتينش هي مكنتش جنبي ليه زي أيمن زي مصطفى زي
ناس صحابي تانيه....حتي لو قررت أكون لوحدي كنت محتاجها...كنت محتاج
سؤالها عليا...قابتلني عادي قالتلي انا اسفه علي الي حصل ربنا يرحمهم..
قعدت تحكي لي عن علاقتها بحبيها مشاكلهم...كأني موجود علشان يتحكي لي و
بس...مخدتش فرصه أنه أقول انا متقطع و يموت من فراق أبويا و أمي و من
حبي ليها...بس للأسف كنت أهبل ساعتها...في يوم دخل عليا أيمن الاوضه قالي
اروي عايزه تشوفك...دخلت قالتلي انه انا واحشها كلمتها بتاعه كل مرة لما
نكون مبتكلمش بالأسبوع علشان مع حبيها...قالتلي انهم سابوا بعض فرحت
حسيت انه الطريق ممكن يكون أفتحتلي علشان اقولها علي الي جوايا.....
خصوصا انه هي قالت انها مجروحته بعد ما بقت لوحدها و انها محتجاني..
علي قد فرحتي علي قد ما بحبها بس مردتش لانه اول مره احس انها انانيه
اوي...انا الي لوحدي انا محتاج الي يكون جنبي مش اكون جنب حد..
قلتله انا الي تعبان و يموت و محتاج حد....مسكت ايدي و قالتلي انا اهو
جنبك و معاك...كلامها ريحني شويه و هديت...كنت زي الغريق الي اترمتله
قشايه برغم علمه انها مش هتنجيه بس برضه بيمسك فيها...قلتله حاضر
واحد واحد بدأت اخرج من الحزن بس بقي جزء مني..بقي الحزن باين علي
ملامي...اروي بقت شيفاني كئيب و حزين..حتي كانت تهز و تقلي يا كئيب..
...كنت يموت من هزارها ده بس كنت بضحك...محاولتش تساعدي علي قد
ما كانت عيزاني اكون جنبها.....كنت لوحدي و محتاجها...في يوم قررت اقلها
اني بحبها...يمكن لما ضعفي زاد او الوجع مبقتش قادر استحملة...قلتله بحبك

قالت عارفه من زمان....بتحبيني يا اروي؟!

-معرفش

= متعرفيش ازاي؟

-بص انت دايمًا جنبى و كده بس انا شيفاك اخويا بحبك اه بس اخويا

= طيب خلاص انا اسف

-انت صدقت انا بحبك انا كمان

محستش انها بجد و لا انه هي كلامها صادق بس ضحكت علي نفسي و
صدقت و دي كانت اكبر غلطه عملتها..

اوعى تكذب احساسك يا ابني و تصدق الكلام اللى مدخلش قلبك...الكلام اللى
من القلب بيطلع من القلب يدخل للقلب...

مبيحتجش مجهود علشان تصدقه..

و انا كنت غبى علشان اصدقه..

أروى كانت بتستغلني نفسيًا..

مفيش اصعب من انه حد ياخد روحك علشان تكون معاه و تبسطه و انت
بس ملكش حق انه تحكى تتكلم تقول لانه ساعتها هتكون كئيب زي ما كانت
بتقولى..

يمكن أروى كانت أنانيه أوى بس أنا اللى رحلتها..

انا لى قتلها عايزك.

أنا اللى سمحتلها تستغلني...

بس فى يوم مقدرتش اسكت

-أروى انا خلاص مش قادر استحمل انا بحس انه انا مش ليا لازمه

= تانى نفس الكلام قتللك لىك لازمه و بحبك

-طيب ليه مش مهمته بيا زي ما انا بعمل

= قلتلك دي طريقتي و مبعرفش اهتم بحد
 -ايوة بس انا نفسي احكيك احس انك جنبي
 = انتي كل ما تحكي تقول كلام كله كآبه و حزن و انا مباحش كده
 -المفروض انه احنا مرتبطين يعني نشيل هم بعض
 = اه بس انت كئيب مضايق اوي كده روح انتحر
 -للاسف الانتحار رفاهيه مش عندي
 = تاني كلام كئيب ازاي اصلا الانتحار رفاهيه؟
 -لانه مش اي حد يملك رفاهيه انه ينهي حياته او يحس بالوجع اللي قبل
 الموت بأختياره...و الروح دي بأيد ربنا مش حاجه خاصه بيا...محدث بينهي
 حياته و هي نعمه من ربنا...روحي مش ملكي علشان اقتلها
 = طيب يبقي خلاص اسكت و استحمل مش كل شويه تحكي لي وجعك و
 مشاكلك...انا مش بكلمك علشان تجبلي كآبه
 كلامها كان رصاص بجد جرحني اوي قررت ابعد عنها بعدها قررت ابعد حتي
 لو بأموت و كأن ربنا سمعني بعدها باسبوع اتشخصت بالسرطان.....أروي
 عرفت و جاتلي في المستشفى انت كان نفسك تموت و اهي جتلك و انا مش
 عايزه اربط حياتي بحد كئيب و مشيت كلامها كان اشد من السرطان اللي بياكل
 فيا...مكنتش أتخيل أنه تكون بالقسوة دي.....هو قد كده فيه قسوة....فيه
 ناس قلوبها كده...لولا اخويا ووجوده و دعمه ليا مكنش زمان عايش اصلا و
 لا بحارب السرطان و اكسبه...بعد ما أروي مشيت جه و قاللي انا عارف انك
 بتحبها بس الحب مش كفايه الحب من غير اهتمام يبقي استنزاف انت لازم
 تبقي قوي علشان نفسك و علشاني انا مش هاستحمل اخسر كل الناس....هي
 كانت مش مهمته بيك او مش جنبك لانها مكانتش تستاهل قلبك...دور علي

اللي يستاهل قلبك.....دور علي اللي يستاهل تفكيرك و اهتمامك...دور صح...
مش دايمًا أول حب هو الصح....مش دايمًا الحب الأول بيكون فيه كل شغفك
و اللي بتتمناه

خلي بالك من اللي بتتمناه لانه ممكن ميحققش و ممكن يأذك

خفيت من السرطان و بقي عندي ١٨ سنه كنت شاب لسه داخل الجامعه
جديد فرحان بيها فرحان بنفسي فاكر نفسي مفيش حد زي بس انا كان فيه
زي ناس كثير انما هي لأ....مكنش فيه

حد زيها اول ما دخلت المدرج انا فتحت بقي و تنحت و سألت مصطفى
صاحبي مين دي؟!...قالي يا عم اصبر هتشوف كثير انت مع اول واحده
عملت كده امأل لو شفت غيرها ة غيرها هتعمل ايه!!!...قلتلته مفيش غيرها
يا مصطفى....ازاي مفيش غيرها يا أحمد يعني انت حكمت يعني انه مفيش
غيرها ما زيها زيههم...لا يا احمد دي مش زيههم...بصلي بقرف و قالي ماشي يا
اخويا لما نشوف...

جت قعدت في بنش الناحيه التانيه و انا طول المحاضره دماغه متشقلبه
ناحيته...هي مخدتش بالها مني و لا كنت متوقع انها تأخذ بالها مني اصلا
اصل قمر زي دي هتبصلي ليه ايه المميز فيا يعني؟!...شعر طويل..عيون
واسعه و عسلية....ابتسامه صغيره رقيقه تسحرك من اول نظرة
روح يومها البيت و انا مبفكرش غير فيها بتخيلها معايا في بيتنا وسط عيالنا
كمان شكلي سرحت فيها بجد و حبيت.

رحت الجامعه ثاني يوم مستني اشوفها بس شفتها بس مدخلتش و مشيت و
هي ماشيه لمحتها بتعيط....يارتني جنبك امسح دموعك و اموت و اقتل الي
يزعلك و لا اني اشوف دموعك دي...

تالت يوم و رابع يوم و مجتش اهو و عدي الاسبوع و مجتش لحد يوم الجمععه

بفتح جروب الدفعه لقيت واحده بتسال اخدنا ايه الاسبوع ده و حد يعرفها
الجدول بصيت للصوره لقيتها هي اسمها ورد و هي فعلا احلي ورد ياه يا ورد
ابراهيم لو تعرفي انا جوا قلبي ايه من ناحيتك فضلت فاتح الجروب مستني
حد يرد مفكرتش ساعتها اخد المبادره و ادخل اكلهما او ارد عليها بس علشان
انا خايف تخرجني فتحت الاكونت و قعدت اقلب للأسف قافله كل حاجه في
الاكونت مفيش قدامي حاجه غير صورتها و سنها و ساكنه في القاهره طب ما
انا كده معرفتش حاجه برده رد عليها ولد قالها هابعتلك اللي خدناه و الجدول.
..ايه ده؟! طب و انت مالك يعني...يارب متردش عليه يارب...ورد ردت قالتله
شكرا بس اكتبهم هنا لو سمحت ملهاش لازمه تبعتها علشان لو حد سال
عليهم تاني يلاقيهم...انا بصراحه كنت فرحان بسقف كده رد الولد قالها لا اصل
هما كثير...لا ده انت رخم بقي...ردت قالتله شكرا مش عايزه خلاص..انا
استغربت جرأه ورد انها تخرجه كده و حمدت ربنا انه مدخلتش اتكلمت
شاطرة يا ورد و الله بس هي كده قفلت بالنسبالي يعني انا هاعمل ايه ده انا
مكسوف اتكلم يعني بعد الاحراج ده هاخاف كمان بعدها دخلت بنت معنا
في الدفعه بعثتلها الحاجه و شكرتها...كلمني مصطفى قالي عايزين ناخذ كورس
محاسبه قتلته تمام تعالي نروح و كنت بتمني اشوفها هناك انا كنت رايح علي
أمل اني أشوفها اصلا محاسبه ايه...كليه ايه...انا عايز ورد و بس...عدي
اسبوعين في الجامعه و اسبوع في الكورس..فين ورد؟!...بأفتح اكونتها كل يوم
علي امل بس مفيش اي حاجه..مفيش اي حاجه باينه و لا حاجه جديده....
بعد اسبوع لقيت ورد بتسأل عايزه كورس محاسبه...فضلت ساكت و متنح
بعدها مسكت و رديت عليها و قتلها علي مكان الكورس الي باخد معاه و
كبتلها رقمه...قفلت التلفون و حطيطه علي وشه و سكت بعد نص ساعه

مسكته فيه حد رد عليا يارب تكون ورد و متهزقيش...لقيتها ورد ردت قالتلي
شكرا..رد عليها كذا حد بكورسات تانيه قلت بس كده ورد مش هتيجي ده
حظي و انا عارفه رحت الكورس ملقتهاش طبعاً...يعني لا جامعته و لا كورس
مقفله كده...قعدت في البيت و مرحتش الكورس الاسبوع ده ما هي كده كده
بايظه..لقيت مصطفى بيكلمني بيقلي مجتش ليه قتلته كنت مكسل رد قاللي
انت الخسران حبيبتك جت..حبييتي مين يارب تكون ورد...رد قالي البنت الي
انت قتلتي عليها و طلع اسمها ورد صاحبها نادتها كده...رديت عليه قتلته
بطل هزار ده موضوع وراح خلاص...ضحك و قالي ماشي هاشوفك في الجامعه
بكره قتلته طبعاً..نمت يومها فرحان و مش بفكر غير في ورد و الكورس مع ورد.
..رحت الكورس و انا مستني ورد عمال ابص علي الوقت عدي نص ساعه و
مجتش..قلت مشيت حظي و انا عارفه برضه....الباب خبط قلت يارب ورد...
طلعت ورد فعلاً بتستأذن تدخل علشان متأخره...ثواني ايه الصوت ده هو ده
صوت ملايكة و لا صوت من مزامير داوود...دخلت ورد قالتلي ممكن اعدي
انا متنح في جمال الصوت و مش مركز مصطفى خبطني قالي عديها...فقت و
قتلتها اه اتفضلي اسف...ردت و لا يهملك دخلت قعدت قدامي و انا لا مركز
في كورس و لا نيله...انا مركز في القمر الي قدامي شعرها منسوج نسج اسود
لكن يفكر ك بسما صافيه فليله مفهاش قمر و لا نجوم يبقي فيها نجوم و لا
قمر ازاي و هي موجوده...خلص الكورس وروحت طول الطريق مبتكلمش
مصطفى يومها صمم انه يروح معايا...و احنا في الطريق قالي كده مينفعش و
مش صح....قتلته نعم بتقول ايه..قالي لو بتحبها اوي كده صارحها او تنساها
الحب محتاج حد شجاع و يكون قده و ده لا فيا و لا فيك..قتلته بحب مين يا
ابني انت اهل و ضحكت علشان اداري الموضوع...رد انت عرفتھا و انا

ملقتش الاسم يبقي انا كلامي صح...قلتله ما انتي قلتله عليها حبيبتك فتوقعت انها ورد...راح قايل توقعت ماشي بس لو بتحبتها روح قولها....سكت و مردتش. فضلت طول الليل افكر اتكلم معاها ازاي و لا اقولها ليه اعمل ايه ملقتش حل لحد ما نمت.....رحت الكليه و لقيت ورد هناك فرحت اوي...و انا نازل من السلم خبطت فيها...بصلتلي و قالت انت مالك يا أبني في ايه...قلت بس كده اتنيلت اوي..قلتله و الله اسف انا و الله مخدتش بالي..لقيتها بتضحك و بتقولي انا بسأل مالك بجد...مش مركز علي طول كده انت فيك ايه واخذ عقلك كده...رديت قلتله انتي..معرفش دي ازاي طلعت و لا حتي انا عملت كده لقيت ورد وشها احمر و اه علي الجمال فعلا ورد...بعدين رديت بسرعه و قلتله انتي الي انا مكنتش راضي اعديكي في الكورس افكرت انا اسف تاني. ...سكت ثواني و قالتلي كفاهه اسف كتير كده و بعد كده متسرحش في حد علشان متقعش علي وشك و ضحكت و ياه علي جمال الضحكه مع كسوفها ايه الجمال ده...كانه جمال العالم اتجمع في ورد..كأن بنات الدنيا اتخلطوا في ورد وروحت بيتنا و انا فرحان ورد عرفتنني...رحت الكورس بعدها لقيت ورد جايه قدامي بتقلي ممكن اعدي و لا سرحان برضه...ضحكت و قلتله لأ طبعاً اتفضلي بعد الكورس لقيتها بتلفلي و شعرها بيطيّر زي الافلام كده و قالتلي شكرا انك قلتلي علي الكورس ده انا جربت ناس تانيه بس مكنتش فاهمه حاجه..قلتله شكرا انا معلمتش حاجه..تقريباً انا بالنسبالي خلاص صوت ورد و ضحكته و شكلها و تفاصيلها كلها في دمي و جسمي و خيالي...فتحت الفيسبوك و قلت خلاص انا هابت ادد و الي يحصل يحصل انا مش قادر استني دقيقه و مكلمهاش...بعث استنيت يوم يومين ورد مقبلتش قلت خلاص مفيش امل...في اخر اليوم لقيت ورد قبلت انا فرحت و ضحكت و حضنت

التلفون و الله قلبت في الاكونت عرفت انه مامتها تعبانه و انها كانت بتعيط يومها علشان كده... قلبت في الاكونت و قلبت عرفت انها فعلا مميزه و مفيش حد زيه... غابت ورد عند الكورس اسبوع كنت هاموت و ادخل اكلهما بس مقدرتش... لحد في يوم كان صعب اوي بالنسبالي لقيتها منزله صورة مع واحد ماسكه ايده و بتقولي خطيبي و الناس بتباركلها... ايه؟! ازاي خطيبها هي.. اتمنيت يكون كذب او اكون بهلوس اي حاجه.. عيطت يومها كذب الي قال انه الرجاله مبتعيطش... كذب الي قال انه الوجع مش قاسي و انه زيه زي النزيف مبيقفش و لا يسكت.... غبت اسبوع عن الجامعه قفلت التلفون كرهت حياتي كلها... لقيت مصطفى بيخبط عليا و بيسألني ممكن يقعد معايا لانه مشافنيش من زمان قتلته ادخل دخل و قعد معايا... قاللي تبقي كداب لو مكنش الي انت عامله في نفسك ده علشانها و ابقى كداب لو قلتك انه فيه اي كلام او حاجه تقدر تعملها تنسيك الي حصل... بس الايام وحدها هي الي بتنسي و تغير و تقسي القلب.. و الايام هتعتدي و هتنسي... محدش عارف يمكن ورد لسه مكتوبه ليك و نصيبك معاها و هتكونوا سوا.. مرديتش عليه علشان كلامه مكنش مقنع بالنسبالي و لا انا اصلا فيا طاقه ارد عليه... و كمل مصطفى و قاللي انا هاسيبك بس مش عايزك تعمل في نفسك كده علشان نفسك دي هي الي هتنفعك و تفضل جنبك فحافظ عليها.. يمكن اخر جمله قالها مصطفى هي الي كانت مقنعه و قررت اعمل بيها.. نزلت تاني اليوم الجامعه كل حاجه سخيغه دمها ثقيل ملهاش لازمه... لمحت ورد ضعفت بس بصيت الناحيه التانيه لقيتها جايه ناحيتي قلبي انتفض... ندهت عليا قالتلي فينك كل ده انت كنت مسافر و لا ايه.. مردتش علي السؤال و قتلها الف مبروك.. بصت للدبله و قالتلي شكرا ابقى خيلنا نشوفك متغيش تاني... قلت حاضر و مشيت...

معرفش ايه نوع الكلام الي ممكن يكون بيني و بين بنت مخطوبه لانها خلاص
مبقتش من حقي اكر من الاول...كملت حياتي او بمعنى اصح مثلت اني بكمل
حياتي..لحد ما لقيت حد في الجروب بيقول انه والده ورد توفت بعثلها قتلها
البقاء لله و اطمنت عليها و رحت العزا و شفتها بس حتي في الحزن ورد كانت
جميله ورد كانت بتنور ورد كالعاده ورد فعلا....بعد العزا بشهر لقيت ورد
باعته تسألني علي الكورس و الجامعه و كده رديت عليها و اتكلمنا لحد ثاني
يوم..معرفش الوقت عدي ازاي معرفش ازاي سمحت لنفسي انه اكلها كل ده
من غير خوف او قلق او كسوف او حتي انها مش بتاعتي...قابلت ورد في
الجامعه بعدها و سلمت عليا قالتلي انها سابت خطيبها وشي نور فرحت
ضحكت مقدرتش امسك نفسي...قالت هو كان خاطبك انت و لا ايه?...قتلها
لا انا فرحت علشانك لانه شكلك مبسوطه قالتلي ماشي...اديني رقمك علشان
ابقي اكلمك لما تخلص تجبلي الحاجات الي فاتتني...ادتها الرقم و انا مش
مصدق الي حصل و مش مصدق الي سمعته...كلمت مصطفى و انا فرحان
قتله فرح و قال بس خلي بالك الفرصه مبتجيش كتير استغلها المرادي بدل ما
تفضل عمرك كله ندمان...كلمت ورد و قربنا و بقينا صاحب حكلي عن مامتها
و انها قد ايه بتحبها و انها كانت بتعمل اي حاجه علشان تبسطها حتي
العريس ده الي خطبها كان علشان مامتها كانت عايزة تظمن عليها قبل ما
تموت...عرفت انه مامتها الي سمتها ورد علشان كانت بتقلها انها اول ما
اتولدت كانت ريحتها زي الورد...باباها بره مصر بس بيظمن عليها و معاها
دايما...سألتني علي اهلي لاول مره اتسأل عن اهلي و مضايقش و احس اني
عايز احكي قتلها انهم ماتوا في حائه عربيه كنت في ثانوي... و كان اخويا ايمن
في جامعته..... كنت معاهم في العربيه و شفت الموت بعيوني...و قد ايه كانت

فتره صعبه عليا و كنت فيها لوحدي...ايمن مكمش الدراره علشان يشيل شغل بابا و يصرف علي البيت و يمسك المصنع و الشركه...ايمن كمان كان مصمم اني اكمل تعليمي و لولاه بصراحه مكنش ده بقي حالي...ورد كلمتني في يوم قالتلي انها مخنوقه و نازله تتمشي و لو انا فاضي اجي معاها...اكيد انا كنت فاضي حتي لو مكنتش فاضي كنت هانزل دي ورد يعني مش اي حد... نزلت معاها اتمشينا شويه محستش غير و انا بقولها انتي اجمل حد في الدنيا دي و اطيب قلب انا شفته و انك اقرب حد ليا و اني بحس اني عارفك من زمان..اتكسفت و احمرت كالعاده و انا دوبت فيها بزياده...قالتلي و انت كمان و انا بقيت بحب اتكلم معاك اوي و اكون جنبك....ممسكتش نفسي و قتلها بحبك...سكتت شويه و احمرت اكثر و ضحكت..قتلها ده معناه ايه؟!...قالت هو السكوت معناه ايه?...قتلها الرضا قالت يبقي افهم بقي...روحت البيت و نا طابير من السعاده مش مصدق نفسي انه هي كمان بتحبني او علي الاقل حاسه بحاجه من ناحيتي كلمت مصطفى حكته قالي مبروك بس الي جاي اصعب الحب مش سهل و مسؤوليه قتله انت كل مره تقفلها ليه?...قالي مفيش يا عم الف مبروك خلي بالك منها....كلمتني ورد يومها قالتلي انه انا كنت لافتم نظرها...هي كمان كانت شيفاني مختلف...يوم ما اتخطبت كان نفسها اكون انا مكانه مش هو بس هي مكنتش تعرف انه انا بحبها و لا لأ... قتلها انا بعشقك مش بحبك بس..ضحكت و قالتلي ربنا يخليك ليا يا حبيبي.. قتلها دي احلها كلمه سمعتها...ضحكت و قالتلي ماشي يا بكاش...نمت و انا مش بحلم غير بيها و مش بفكر غير انه اصحي علشان اكلهما و اكون معاها...ورد كانت بسيطه كانت قادره بضحكتها تغير اي حاجه مضيقاني او مزعلاني..اوقات كنت بستمد قوتي منها...كانت روحنا كأنها واحده مفيش فرق مفيش

اسرار حتي....ورد عوضتي كل حاجة كانت نقصاني.....عوضتي كل حاجة...
نسيت أروي و نسيت كل حاجة كانت جرحاني.....ورد كانت دائما تقلي انت
السعادة و انا اقلها السعادة دي باخدها منك....كانت احلي سنتين في حياتي
كلها....كان ورد فيها كل حاجة بتمناها...حكنتها عن حبي الأول و اني كنت
مجروح...قالتلي انا كمان كنت مجروح زيك و احنا مع بعض بنبني بعض و
الحب الي بينا هو الي هيقوينا و ينسينا كل حاجة حصلت...يوم عيد ميلادها
العشرين...كان في الشتا...حجرت كافيه علي النيل...بعد ما اخويا بعثلي الفلوس
و مرديش يبعثلي الا لما عرف الموضوع كله.... جبتلها خاتم و قتلها ورد تقبلي
تتجوزيني....سكتت بس انا محستش انه سكوتها ده مش كسوف او بعده
حاجة حلوة كالعادة....و فعلا قالتلي مينفعش...تحت و سكت و الوقت عدي
ببطء لحد ما قالت -انا مش هاعيش هنا...انا مسافره عند بابا

- طيب ما نتجوز و سافري

-لا انا مش عايزه...انا عايزه ابني حياتي و احقق مستقبلي

-طيب ازاي هو انتي مش بتحبيني؟

-بحبك طبعاً...بس حبنا مش معناه انه ارتبطت بيك طول حياتي

-امال ايه يعني الحب الي بينا ده؟

-هيفضل الحب موجود و هافضل احبك و هيكون ذكري حلوه بينا بس انا

مش عايزة حياتي تنتهي هنا....تنتهي زي حياه والدتي....ملهاش حياه و لا

وجود...ملهاش أنجاز...ملهاش حاجة حرفيا

-و انتي ياورد مكنتيش حاجة و انجاز في حياه مامتك؟!

-كنت انجاز لحد احلامه بسيطه...حد كان حياته مش ليه ضيعها بين زوج مش

موجود معاها و طفله...مكنتش عارفها انها هتسيبها في يوم لوحدها

-بس احنا بنحب بعض ياورد
-و انا مقلتش انه مش بنحب بعض و انا هافضل اكلمك و اطمئن عليك بس
العلاقه بينا اخرها هنا
-انتي مقتنعه بالكلام ده؟! مصدقاه يعني!!
-اه مصدقاه

برد الجو...و المطر الي كان يومها...مكنش يجي حاجه باللي جوايا...فعلا
انا كنت بتقطع كان قلبي فعلا كأنه اول مره يتوجع مش انه عدي عليه كتير
و انه مش اول جرح...عيطت ورد مسحت دموعي و هي بتعيط....قالتلي
انا عمري ما هلاقي زيك بس صدقني انا مش عايزه حياقي تنتهي كده...ورد
سافرت تاني يوم مدتنيش فرصه اودعها او حتي اتكلم معاها في الموضوع تاني
بعتتلي علي الفيس بوك انا مش قادره انساك سامحني انا بحبك بس مينفعش
و عملتلي بلوك....اتعلمت يا بني انه مفيش حد هيفضل مفيش حد هيكون
جنبك....انت بس الي هتشيل شيلتك....عرفت انه مش كل الي بتتمناه بيكون
نهايته حلوة...او نهايه فعلا تستاهل شغفك ناحيته...حاولت شغفي بالحياه
مينطفيش او يروح و الحمدلله اني قدرت احافظ علي ده من كل الي حصلي.
..بس للأسف الدنيا هتفضل تهدك و تبنيك...تضعفك و تقويك

مش دايمًا هيكون انت اللي مجني عليك من وجهه نظره نفسك
حتي لو كان غيرك شايفك مش جاني
اوقات بتجرح زي ما بتنجرح

ورد مشيت و خدت جزء مني.... كل حاجه و كل حد عدي عليا خد جزء مني..
..الايام بتنسي فعلا بس بتنسي و هي بتاخذ حته منك...لحد ما تلاقي روحك
اتوزعت علي الايام و علي الناس...يبقي تجميعك لروحك هو هدفك....مش
انك تعيش حياتك...لأ..هدفك بيكون انك تجمع روحك و نفسك....و انا بعد
ورد خلاص بقي الي باقي مني مش محتاج اغامر انه اخسره او يضيع مع حد..
....صحابي حالوا يخرجوني و يكونوا جمبي خصوصا مصطفى و روح....مش
هنسي مساعدتهم...قربت مني روح كانت أطيب قلب عرفته...كان الحجاب
علي وشها بيخلي وشها ينور....عيون ضيقه...ملامح طفله مع لمحه حزن...
بقت بتكلمني اكر و بقت بتسأل عليا كثير...بس عادي احنا صحاب او كنت
بضحك علي نفسي بالكلام ده...لانه من الي شفته خلاص بقيت بحس بالحب
من بعيد...من لمعه العيون...من الضحكه الي علي وشها ساعه ما بتشوفني..
..بقيت بحس بحبها بيحواطنا و احنا قاعدين...بس انا مكنتش عايز اغامر
و احب او اني ادخل حياتها....روح كلمتني في يوم قالتلي عايزة اشوفك و
نذاكر سوا...نزلت قعدت معاها....قلبي كان مقبوض لانه اول مرة اقعد معاها
لوحدا...روحت و انا قلقان...قالتلي انت واحشني
-نعم؟!

-يعني بقالي كثير مشتفتكش و كده

-اه معلش انا مبجيش و مش فيا خلق

-طيب تعالي نذاكر علي فكره شكلك حلو في الدقن

-شكرا بس انا مربيها لانه مكسل احلقها

-لا متحلقتهاش هي حلوه اوي عليك

-ان شاء الله

كنت بحاول اهرب منها..ابعد عن نظراتها...استخبي في الكتاب....روح أظهر
من اني الوثها و ادخلها حياتي....او اني اخسر معاها جزء مني يفضل معاها....
روح انتي احسن مني بجد...قطعت تفكيري و هي بتقلي..ايه هتعمل ايه في
الاجازة....و لا حاجه و انتي...مفيش..طيب كويس..فضلت قاعد ساكت..لحد
ما روحنا....مصطفي أتصل بيا يومها و قال علي فكره روح بتحبك و قالتلي..
عارف يا مصطفى بس انا مش عايز أحب و لا أتحب....أنا معدش فيا طاقه
انا مش عايز اخد اهتمام منها او حب و ارميها...مصطفي سكت و قال كلامك
صح بس برضه مينفعش تكسرهما....قلتلته حاضر و قفلت...حاولت ابقى وحش
حاولت اتضايق اتعصب و اتفرز علي روح و هي برضه متمسكه بيا...قفلت في
يوم في وشها و مردتش عليها لما اتصلت فضلت ترن كثير و انا مردش...بعدها
مصطفي اتصل بيا كثير قلقت ورديت اول ماردت زعق فيا...انت لو راجل
مكنتش عاملتها كده...لأ انا علشان راجل انا بعمل كده

-الحب مش بأدينا يا أحمد و انت عارف

-عارف بس مش عايزها تربط حياتها بيا.....انا مش محتاج حد مش عايز
اضعفها

-هي حبتك و ضعفت خلاص قدر ضعفها

-مقدرش يا مصطفى يبقي كده بأذيها اكر

-انت مش فاهم هي بتحبك ازاي كلمتني بتعيط و منهاره و نفسها بس انت
تكلمها

-انا اسف بس انا مقدرش اخليها تربط حياتها بيا
 -أحمد حرام عليك متكسرش قلبها
 -حاضر انا هاتصرف
 قفلت مع مصطفى وقررت اكلم روح اتصلت قتلها عايز اشوف بكرة ضروري..
 ..وافقت رحت و قابلتها...كنت عايز انهي الموضوع أكون راجل و أواجه
 الموضوع رحت و قتلتها...روح انا عارف كل حاجة...بس مينفعش
 -ليه مينفعش علشان انا وحشه يعني و لا منفعكش
 -الموضوع مش كده يا روح و لا عمري فكرت في كده
 -امال ايه الموضوع فهمني؟!
 -روح انا متدمر من جوه و جودك معايا أذيه ليكي.....وجودك معايا هيدمرك
 -طب ما برضه بعدي عنك هيدمرني
 -لأ البعد مش هيدمر زي القرب...انتي بتقربي من واحد ميت...واحد كل
 حاجه حواليه بتفوح منها ريحه الموت و الحزن...انتي مستاهلش ده
 -بس انا عايزة اكون جنبك و معاك
 -بس انا معنديش حاجه ادهالك و لا حتي عندي طاقه انه اكون معاكي او مع
 اي حد
 -و انا موافقه انا مستعده اديك روعي حتي
 -يبقي انا كده بموتك مرضهاش عليكي
 -انا راضيه علي نفسي
 -روح محدش بيعب اشباح
 -و انت مش شبح انت مكسور بس...كلنا عارفين حبك لورد و حياتكم كانت
 عامله ازاي...بس برضه حرام عليك تدفن نفسك كده

-بس الي انتي طلباه ده مش عندي

-انا هأدهولك

-يا روح انا مش عايز ابقى جلاذ و لا عايز ابقى المستغل الي بياخذ طاقته منك

و مش هيكمل معاي

-حتي لو مش هتكمل معايا انا محتاجاك

كلام روح كان صعب مكنش قدامي فرصه انه ابعد او حتي اهرب منها

بالنسبالي كنت حاسس انه الزمن بيعيد نفسه علاقتي انا و أروي كانت قائمه

علي كده...بس المرادي انا مكان أروي يمكن شفت ساعتها الموضوع بنظرتها.

...فهمت انها كانت محتاجه حد بعد ما بقت لوحدها...اي حد جنبها يمدھا

بالحب و الاهتمام....وانا كنت الخيار الي قدامها...بس انا مش عايز كده من

روح و مش عايز ابقى كده مش عايز اعمل الي أروي عملته فيا....انا مش

عايز استغل حد علشان اعرف اكمل حياتي...روحت نمت محبتش افكر في اي

حاجه علشان انا مبقتش فاهم انا ليه عملت كده...عملت زي دومينو في لعبه.

..اتحط في مكانه و بس....تاني يوم الصبح مصطفى اتصل قاللي تصدق غريبه

اوي الدنيا دي؟!

-و ليه بقي غريبه؟!

-يعني لما واحد بلا قلب يفكر يرتبط بواحد علشان قلبها بيحبه بس....مش

بذمتك تبقي غريبه؟!

-انت متصل تهزر يعني

-لا مش بهزر انا معجب باللي انت عملته بس مش فاهمه

-و الله و لا انا فاهمه

-بص حاول متكسرهاش و متجرحهاش

-هحاول يا مصطفى

كذبت عليه و قتلته هحاول لاني عارف انه هاكسرها في الاخر و مش هاقدر
مكسرهاش

روح كان فيها كل حاجات كتير اوي انا شخصيا لو شفتها قبل كسرتي كنت
هتمانها بس للأسف...الميت عطشان لما بتجيله الميه مش بترويه...بيكون
خلاص ملهاش لازمه....و انا روح كانت فعلا جنبي...كانت بتتصل بيا في اليوم
ميه مره...اكلت..شربت..لبست...كل تفاصيلي كانت بتسألني عليها و كأنها
عايزه تزيل كل الحواجز و تبقي هي و انا واحد..بس للأسف ده مستحيل...
كنت بحاول اسايرها...او علي الاقل مخلهاش تحس انه العلاقه دي من طرف
واحد...علي الرغم من انه دي الحقيقه و هي حاسه و اكيد عارفه ده....بس
انا علي قد ما كنت حاسس اني ظالم..منكرش انه كان جوايا احساس بالسعاده..
لانه فكره انه حد يكون بيديك كل حاجه و انت مش ملزم بأي حاجه ناحيته
احساس حلو...انا عمري ما كنت وحش كده بس معرفش ليه كنت فرحان...
اقمني انه الاحساس ده يروح انا مش عايز استغل حد زي ما اروي كانت بتعمل
معايا و لا أحس اني باخد حقي من اروي في روح

مش عايز ابقى كده و ان شاء الله مش هابقي كده...و هحاول اسعد روح حتي
لو فوق طاقتي بس علشان محسش بالذنب و لا اني ابقى شخص مستغل....
حاولت أقرب من روح...اشوف تفاصيلها اكثر...روح طيبه و بريئه..عنيها فيها
لمعه لما بتبص عليا مفيش زيتها...حقيقي انا اوقات بحسد نفسي علي لمعه
العيون دي و هي شيفاني....اوقات ليه لاني خايف أطفئ اللمعه دي لما نبعد و
احنا هنبعد...يمكن روح لو كنت قابلتها من زمان كانت اكيد فرصتنا احسن...
روح في يوم قالتلي انا عارفه انك مش بتحبني و لا هتحبني

-ليه بتقولي كده؟!
 -بص انا مش غيبه و عارفه
 -طيب لما هو كده انتي مكمله معايا ليه؟!
 -علشان بحبك
 -طيب هو انتي مستعده حبك ده يوديكي لحد فين؟!
 -يعني ايه؟!
 -يعني حبك ليا ده اخرته ايه بالنسبالك؟!
 -ولا حاجه
 -طيب هو فيه حب مبيوصلش لحاجه يا روح
 -للاسف فيه حبي ليك
 بصي انتي هيجيلك و قت و تزهقي و انا خايف انه روحك تتسحب منك
 بسببي او انه اذيكي....قلتله الكلام ده وسكت...اخذت روح روحتها و قتلها
 هاكلمك لما اروح...طول الطريق بفكر ازاي اقرب من اروح و أحاول بس
 أفرحها...علي الأقل روح متحسش انه كنت وحش اوي معاها.....قربت منها.
 حاولت افرحها فعلا اخرجها...اكون جنبها اديها اللي تحتاجه...بقالنا سنه
 علاقتنا كويسه او بيان شكلها كويس...روح اتصلت بيا
 -ازيك يا احمد
 - الحمدلله عامله ايه؟!
 - كويسه شكرا علي كل حاجه عملتها لي وشكرا انك فرحتني في السنه دي حتي
 لو كنت انت نفسك منهار
 - ايه الكلام الغريب ده ليه بتقولي كده؟!
 - بص يا احمد انا كان بقالي فتره تعبانه و انت بنفسك لاحظت ده و قتلتي

قتلك لا عادي ده ارهاق بس

- اه و اصريت انك تكشفي

- مكنش ليه لازمه لاني عارفه المرض و امي ماتت بيه

- انتي مقلتيش انه مامتك ماتت بسبب مرض

- ايوه لاني عارفه انك اكرت واحد عارف المرض ده

- ايه ده؟! مامتك كان عندها كanser

- مش مامتي بس انا كمان

- نعم؟! و لما انتي عندك مقلتيش ليه مرحتيش اتعالجتي ليه؟!

- علشان انا كده كده عايضة اموت

- روح بطلي هبل انا هاخذك بكره و نروح اول جلسه سوا مش هاسييك

- بس انتي مش ناقص و فيك اللي مكفيك

- مفيش الكلام ده بكره الصبح هاكون عندك و نروح

- ماشي يا احمد

- خلي بالك من نفسك

- سلام

قفلت معاها و انا قلبي مقبوض يمكن لاني افتكرت الي انا مریت بيه او الي

كنت فيه يمكن لأنه روح زي لوحدها ملهاش حد حتي الي حبته مش بيجبها.

..بس قررت ساعتها اني هاوقف جنب روح مهما كلفني الموضوع من تعب

او اي حاجه مش هاسييبها لوحدها...أنا متعودتش اكون ندل و خصوصا مع

حد حبي...دخلت نمت صحيت الصبح بدري كلمت روح و استنيتها....نزلت

كانت زعلانه شكلها منامتش مبطلتش عياط...مسكت ايدها قتلها متخافيش

انا جنبك و مش هاسييك...بجد يا احمد؟!...بجد يا حبيتي

نويت يومها فعلا اني افضل جنب روح لحد ما اموت فعلا...ممكن يكون احساس انها شبيهي او انها لوحدها او منحوسه زي تقريبا و قررت اني ا بقي معاها حتي لو هاعيد تجربتي ثاني كلها...احساس اول جلسه كيماوي احساس أول أبره علشان تتعالج...انا فعلا كاره كل ريحه المستشفيات.. كل التفاصيل الي ليها علاقه بالمرض و العلاج....كل حاجه فعلا كانت بتموتني بس انا كنت بمسك نفسي علشان روح...للأسف انا عرفت انه حاله روح متأخره حتي لو الدكاترة خبوا ده...بس كنت بحاول اقنع نفسي و اكذب و اقنع روح بأنه هي لسه في أول مرحله و المرض لسه بدري...المشكله أني حاطط أمل كبير علي حاجه مستحيله تحصل و براهن عليها و عايزها تنجح و هي مش هتنجح.. زي انك متروحش الامتحان و تتمني تنجح...اليأس اوقات بيتملك منا...بس للأسف انا مش شايف غير اليأس قدامي...حاولت اخبي علي روح و أظن اني قدرت أو تقريبا هي برضه قررت تخبي عليا و تصدقني..روح اتحجرت في المستشفى و انا قررت اني أبأت معاها كل يوم....كان مصطفى بيجي اوقات يقعد معايا و كان صاحبنا دايمًا بيجوا يقعدوا و يباتوا معاها اوقات لما الظروف تسمح....مصطفى جه في يوم و قال عايزك في موضوع -أحمد انت جدع بجد في الي انت عملته -انا معمלתش حاجه احنا صاحب قبل ما هي تحبني و الي أنا عملته ميقلش عن اي حاجه حد فيكوا عملها -انت شايف الي انت عامله قليل بس هو كثير -و لا كثير و لا حاجه انا معمלתش اي حاجه قلت لمصطفى ماشي و سكت...انا عارف انه ممكن يكون في عيون الناس انا عملت كثير...بس انا كنت مستغل استغليت مشاعر روح...ولو فضلت عمري

كله معاها علشان اكفر عن الغلطه دي مش هاسامح نفسي...وقوفي جنبها طول العمر مش هيكون رد لجميلها...روح ندهت عليا دخلتلها...و قالت -انت بقالك اسبوعين معطل حياتك و كل شويه موجود هنا حتي لو مفيش بيات موجود

-هو ده وقته يعني...أيه الكلام ده؟! بطلي بس
-مش هأبطل انت اكر حد فرحني في حياتي...فاكر لما قتللك بحب المشبك ورحت طنطا مخصوص و رجعت في نفس اليوم علشان تفرحني بس...فاكر لما كنت بتسني تحت البيت يوم ما أجيش الجامعه علشان تطمئن عليا...فاكر لما كنت بصحيك كل يوم الفجر نتكلم و نصلي...انا فاكره و مش هنسي
-ايه لازمه الكلام ده يا روح؟! ارجوكي بطلي

-بس يا أحمد الأنسان بيعس بنهايته و بيعرف انه خلاص مبقاش عنده وقت كفايه...بالنسبالي كان كفايه كل اللي عملته علشاني...انا هأموت و خلاص عارفه -متقليلش كده ان شاء الله هتبقى كويسه و تخفي
-سيبني اكمل يا احمد ارجوك انا مش عايزه منك غير انك تفتكرني...أفتح الدرج اللي جنبي ده...هتلاقي السلسه اللي جبتها...في اول عيد ميلاد ليا لما عرفتني....خدها خليها معاك علشان تفتكرني بيها

-بس انتي هتخفي يا روح
-لا بلاش كذب و تضحك عليا

للأسف المرض كان فعلا متمكن من روح كان يابن علي ملامحها و شكلها.... كانت بتقلي خايفه من شكلي ووقوع شعري...كنت بقلها مش مهم كده حلي و الشعر هيطلع تاني...كانت بتصدقني...بس للأسف المرادي مقدرتش اخبي او اضحك عليها...اخذت السلسه و لبستها و انا مش قادر اتكلم.

و كأن احساسها كان مربوط بالسما.... كأنه كانت علي علم بنهايتها.... كانت في الشتا برضه... كأنه الشتا كان دائما موحش معايا.... عمري ما حبيت الشتا.. بحس الدنيا بتضلم فيه اوي.. بحس انه ليله كئيب... ليله بيجرح... ايام الشتا ناقصها دفا فعلا.... ناقصها روح

تاني يوم الصبح عديت عليها كالعادة بس للأسف روح كانت ماتت... فعلا أظهر الناس هي الي مبتكملش... ربنا بياخدهم عنده بدري... لانه الي زيه كان غلظت يعيش وسطنا... أو يكمل حياته معنا

الأوضه فاضيه... كئيبه مفيهاش ابتسامه روح.... مفيهاش ريحتها... فعلا فيه ناس بتدي الحياه لكل حاجه حواليتها... بتلمس روحها بيها... و روح كانت كده كانه فعلا كل انسان بياخذ صفه من اسمه... روح كانت فعلا روح.... كلمت مصطفى و صحابنا و رحنا دفنا روح في قبر مامتها و باباها زي ما كانت موصياني.. حسيت انه كل حاجه فجأه ضلمت... بقت كئيبه.. كأنه انا الي مت... لأنني حاسس اني فعلا كنت مقصر مع روح.... مهما عملت مكنتش هأديها حقها.. .. أعظم الناس الي يلاقيك مكسور فيحاول يجمع روحك و نفسك.... حسيت أنه روح فدت نفسها علشان أعيش... فضلت اعيط دموعي مقدرتش امسكها.. .. خلصت اخر امتحان و اخر سنه في الكليه... و قررت معاها انه ارجع لطنطا.. .. كنت عايز اسافر... أبعد من طنطا.. أبعد من قاره افريقيا نفسها.... حاولت احضر ماجستير محاسبه... مكنتش غير خطوة من حد بئس انه يبعد... يمكن ينسي... يلم الي باقي من نفسه... ماتت روح و انا حاسس انه انا الي كنت جاني عليها مكنتش المرض

ممکن تجیلک فرصه آنک تقابل الماضي بس أنت بتكون اتغيرت خلاص مبقاش
کل حاجه جواک زي ما هي

الناس يا ابني اختلفوا في انه الاصعب بدايه الطريق و لا نصه و لا نهايته...
للأسف انت في لحظه هتعرف أنه الطريق كله صعب...الطريق مفهوش راحه.
من بدايته و انت بتحاول تبدأ و تحارب علشان تبدأ طريقك...و توصل لنصه
و تلاقي حاجات كتير اوي اتغيرت فيك و ممكن يكون قررت تغير طريقك كله
و تبدأ من جديد لأنه ضاع شغفك او صعوبه انه تكمل و تعافر علشان توصل
لنهايه الطريق....أو نهايه الطريق لما بتكون فاكرك أنك وصلت لنهايته و مرحله
الراحه بس للأسف انت بتكون وصلت لنهايتك..أفكارك حروبك جروحك كلها
بتكون قدامك...حياتك بتعدي عليك كلها...بتحزن بتفرح بتبكي...بس للأسف
بتلاقي انه الطريق ملوش نهايه الا الموت....مهما عدت عليك مشاكل و هموم
حاول انك متشلش الحمول دي كلها فوق ضهرك...علشان متنكسرش و ضهرك
ينحني...اتمسك بالأمل حتي لو ممكنش موجود لانه أظلم الليالي بتنتج أعظم
النجوم...سافرت أنجلترا...حاولت انسي كل حاجه حصلت حاول ابدأ من
جديد..بس للأسف اوقات الهروب من الماضي بيحطك تاني قدام الماضي...كأنه
مفيش داعي للهروب أنت كده كده محاصر....مكنتش متخيل انه اول اسبوع
ليا في انجلترا اشوف ورد...قدامي بتفطر في نفس المكان الي انا فيه...مصدقتش
قلت يمكن الحنين يمكن فيه جزء جويا لسه بيحبها لدرجه انه بيتخيلها قدامي..
مقطعش تفكيري غير صوتها و هي بتقول الصدف بتكون غريبه احيانا و
حلوه...قتلتها اوقات برضه الصدف بترجعك لحاجات انتي عايزة تنسيها
-ياه للدرجادي مش طايقني!

-الموضوع من تلت سنين بس صعب يتنسي...صعب حد يسببك و انتي متمسكه بيه...أظن ليلك سعيد و انتي مقضياه لوحدهك...بتفكري في كل حاجه حصلتلك

-بس أنا مظنش انك كنت لوحدهك بدليل السلسه الي عليها اسم روح الي انت لابسها

-السلسه دي صاحبته كانت اطهر مني و منك....صاحبته ماتت و انا لابسها علشان بحس انه صاحبته محوطاني...أنه روحها معايا -طب و أنا؟!

-مظنش أنه حد بيسبب حد و يرجع يلاقيه مستنيه حتي لو حياته فيه....أظن انه في اللحظة الي كان ممكن تختارينني مختارتينش و سبتيني...مش هترجي تلاقيني زي ما انا حتي لو كنت لسه بحبك -يعني انت لسه بتحبني؟!

-عمرك ما كنتي تعرفي معني الحب....عمره ما كان مهم بالنسبالك...عمره ما كان أولويه يعني...انت عايزة يبقي ليكي حياتك و نجاحك -و اكتشفت أنني غلط...اكتشفت أنه وجودك معايا كان هو الي انا محتاجاه و بس

-صدقيني يا ورد الكلام ده ملوش لازمه...الماضي ميريجعش -بس انا بحبك و محتاجاك و انت عمرك ما كنت قاسي خصوصا معايا -حاجات كتير اتغيروا يا ورد و انا منهم -بس انا عايزة منك فرصه واحده بس....أثبتلك انه أنا فعلا بحبك -للأسف مينفعش انتي كان عندك فرصه...و أنا مش هاجرب حد أنا مجربه قبل كده...مش هأثق تاني في حد...طلع ميستاهلش

-مش ملاحظ أنه كلامك قاسي اوي؟!

-و انتي مش ملاحظه أنه كان قاسي اتساب من تلت سنين بعيط قدامك انه متسبنيش....و مدتنيش فرصه حتي

-طيب يا احمد انا اسفه...مممكن تديني رقمك علشان أبقي حتي اطمئن عليك
ساعتها اترددت لثانيه و كأني بضعف او عايز اختبر نفسي انه تكون هي قدامي
و انا مش عايزها علشان كده قررت اديها الرقم...خدتته و استأذنت تمشي
علشان شغلها....قعدت بعدها مع نفسي ببص للقهوة قدامي و شربت منها
شويه...مكانتش القهوه نفس طعهما زي كل مرة و كأنها هي كمان حاسه
بالاستغراب من اللي أنا عملته...يمكن لما بتتغير من جواك طعم كل حاجه
بتتغير او بتحسه لأول مره تاني....أنا مكنتش قاسي مع ورد بالنسبالي و لا
حسيت بتعاطف معاها...مكنش أنتقام و لا كان قسوة....بس فعلا أوقات
بتوصل لمرحله من النضج أنه تتخلي عن حاجات بتوجعك وورد كانت حاجه
بتوجعني....بقول لنفسي اوقات يمكن لو فضلت معايا مكنتش قربت من روح
و اتعذب انه شاييل ذنب موتها....بس برضه لولا روح مكنتش هاقدر أعيش و
أكمل....بس انا فعلا كان قلبي ناحيه ورد مات...الكلام كان بيطلع مني بدون
تفكير...الكلام طالع من جوايا....نفسيا حسيت براحه....منكرش انه حسيت
بالسعاده و هي عيزاني ارجعلها و انا رافض....ورد كلمتني تاني يوم سألتني اذا
فاضي اعتذرت منها لأنه كان ورايا مذاكره و محاضرات و اتفقت اقابلها اخر
الأسبوع في نفس المكان اللي أتقابلنا فيه اول مرة....دخلت المكان ورد قاعده.
..يمكن أول مرة ورد تستناني في مكان...كان دايمًا أنا اللي بروح بدري و أفضل
مستني مكنتش بحب اسيبها تستني...بعكس المرادي رايح و انا رجلي ثقيله...
بتأخرني كل ما بحاول اوصل...كأنه جسمي رافض اني أشوفها....دخلت سلمت

عليها و قعدت

-مكنتش متوقعه انك تيجي

-مظنش انه هأكذب كان ممكن اقلك مش جاي

-طيب كويس وحشتني علي فكره

-ياه...كان زمان الكلمه دي كفيله تنسيني كل حاجه في الدنيا و تفرحني بس

دلوقتي خلاص...بتعدي علي وديني زي كلام المجاملات اللي ملوش طعم

- طول عمرك بتكره المجاملات...مبتحبش النفاق....بتحن لكل حاجه قديمه...

حتي المكان ده تحس كأنه الزمن معداش عليه علشان كده مستغربتش انك

تكون قاعد هنا...علشان كده لما كلمتك أخترت نقعد هنا علشان عارفه انك

حببت المكان ده...طول عمرك تقليدي بطريقه غير تقليديه

-و أنتي طول عمرك بتحاولي تبينيلي أنك فهماني و أني قدامك كتاب مفتوح...

بس فعلا عمرك ما عرفتيني

-أنت ليه رافض كل كلمه ليا كده؟!....أمال جيت تقابلي ليه؟!

-أنا مش رافض كلامك انا بس ببعد عن كلام ملوش لازمه...جيت أقابلك علشان

احنا كان بينا معرفه سميها عيش و ملح...علشان المفروض صحاب مثلا...و

علشان أثبت لنفسي أنه فعلا نسيتهك و أنك بره حساباتي و حياتي

-يعني مفيش أمل نرجع لبعض

-نرجع لبعض؟!...بعدنا مكنش بأختياري...أنا بنفذك قرارك...أنا موجود زي

اخوكي صاحبك...أكثر من كده مينفعش

-طيب بس علي الأقل خليك جنبي...مممكن؟!

-برضه انا مبعدتش..أنتي اللي بعدتي و قتلتهك انا أخوكي و صاحبك...فمش

هبعد...بدليل أنك لما طلبتي نتقابل أنا مرفضتش

-يعني صحاب و أخوات بس؟!

-اه بس

-طيب انا موافقه....ممکن ناكل بقي؟!

-اه طبعا يلا

كلمني أيمن أخويا يطمئن عليا كالعاده زي كل يوم....قاللي علي فكره أنا
اتجوزت

-مبروك الف مبروك..بس مش المفروض اكون جنبك

- يا واد ده انت ابني فيه اب بيخلي ابنه يحضر فرحه محبتش الخبطلك حياتك
بس...أول أجازة لما تنزل انت معزوم في بيتي

-حاضر ربنا يخليك ليا

-مال صوتك يا واد

-مفيش بس كان عندي موضوع قديم خلصته

-أظن لو ده موضوع ورد فتبقي معجره

-ههههه هو

-ياه اخيرا هنفرح بيكوا امتي؟!

-لا أنت مش هتفرح علشان انا قفلته خالص

-ليه؟! و الحب الي كان بينكوا راح فين

-مات الحب الي محدش بيهتم بيه ويموت يا أيمن

-طيب يا حبيبي ربنا يريح قلبك..سلام

-سلام

نمت يومها كثير و كآني بحتفل بليله فيها هدوء و سلام نفسي داخلي قليل لما
بلاقيه...كأن تغيير المكان أداني قوه لتغيير حاجات تانيه...فرصه للحكم علي

أمر و الحاجات بطريقه مختلفه...فعلا العزله او السفر بيغيروا الواحد...
عدت سنه و كنت خلصت الماجستير...طول السنه دي كنت أنا وورد صحاب..
مكنش بينا اي مشاعر من ناحيتي و المفروض من ناحيتها برضه...نزلت
مصر أخيرا...مكنتش حابب أنزل الا بعد لما اكون فعلا حاسس اني أقدر اواجه
الناس...حاسس اني بقيت انسان جديد فعلا...قبل ما أسافر ورد قالتلي انها
هتنزل مصر مهتمش لأنه الموضوع بالنسبالي مش فارق...رحت بيتنا القديم
شقه أبويا و أمي...دخلتها محستش بنفسي الا و أنا بيعيط ببكي...معرفش
ليه يمكن وحشوني...بس أنا برتاح في العياط..عمري ما صدقت انه مفيش
راجل بيعيط...الراجل بيعيط و بينجرح....هو مش من لحم و دم يعني....البكا
عمره ما يموت القلب...عمر ما يخلي القلب يحس بجفا...علي قد ما اوقات
مممكن يكون ضعف...لكن عمره ما كان حاجه حد يتكسف منها...أو تنقص
من رجولته....والدي الله يرحمه قالي ابكي...الحاجه الحرام و الغلط هي الي
تنقص من رجولتك و بس غير كده مفيش...عمر البكا ما نقص راجل...بس
القسوة نقصت رجاله جديده

اوقات بتلاقي بدايه مشرقه تنسيك كل حاجه و لكن النهايه بتكون مدمره

كلهم قالوا لا تغريك روعه البدايات.... مع كده كلنا بنتخذع من روعه و جمال
البدايات.... بننسي كل حاجه و بنضعف قدام جمال البدايات.... بقي عندي ٢٤
بقيت ناضج كفايه... او كنت فاكرك كده لأنه كل مرة الدنيا بتدخلك في مرحله
جديده.... تخليك تنضج أكثر... قررت اخذ شقه في القاهره و اسيب طنطا....
أيمن اعترض بس كالعاده أقنعتة ووافق... سلمت عليه و علي مراته الي فعلا
ربنا عوضه بيها عن الي شافه في حياتنا... سلمت علي ولاده الأثنين... احمد علي
اسمي و حسن علي أسم بابا الله يرحمه.... مسافر القاهره و أنا مش قلقان
من بدايتي الجديده هناك... لأنني كنت بحاول استعد ليها من ساعه ما رجعت
من السفر... قدمت في شركه كويسه.... أشتغلت فيها بكل جهد... لحد ما بقيت
مدير فرع القاهره في سنه واحده.... يمكن دفن نفسي في الشغل مخلنيش أحس
بحاجات كتير بس كان أحسنلي... حسيت أني أقدر أفتح قلبي لحد جديد... و
أخوص تجربته و اتجوز.... يمكن محبتش أدور و سبتها بطروفها لحد في يوم
جالي بنت والدها صاحب شركه و عايزه تمضي عقد تسويق مع شركتنا... شفتها
كانت من الناس الي تشوفهم تتشد ليهم بلا سبب أو هدف حتي.. ممكن
تلاقيها عاديه.. لكن هي قادره تشدك... شعر أصفر طويل... عيون بنيه واسعه.
.. ملامح وش خليط بين الانوثه و البراءه.... أتمنيت أنها متكونش متجوزه و لا
فيه أي حد في حياتها... دايمًا الأعجاب من اول نظرة تكلفته غاليه... خصوصا لو
مكنش الاعجاب متبادل او وصل لحب بين الطرفين.... بس انا اتعلمت من الي
فات... اني اتحكم في مشاعري... أسيطر عليها... مجريش وراها زي زمان... دخلت

ابتسمت و قالتلي انا جنه...قلت في سري فعلا...لازم تكوني جنه...اتكلمت
عرفتني عن نفسها و شركتهم و كل حاجه..لمحت بسرعه أيدها و هي بتتكلم
مفيش في ايدها دبله الحمدلله...اتكلمنا في التفاصيل و أخذت رقمها علشان
نتابع مع بعض العقد و الاتفاق..بالنسبالي كانت هي الاتفاق و هي العقد اللي
أنا عايز امضيه...علي قد ما كان ممكن يكون فيه زيه..علي قد ما كان فيها
حاجه غامضه تشدك...قررت أنسي الموضوع شويه و أشتغل...خلصت العقد
كلمتها و جت...زي المره اللي قبلها كأنه أول مره أشوفها....الشعر و العيون
كل حاجه....كأنني مشفتهاش قبل كده....بصينا علي العقد و أتفقنا و كل حاجه.
أخذت منها ميعاد أنه نتعشي احتفالا بتوقيع العقد...و ده مكنش غير فرصه
انه يمكن أقرب منها او اتعرف عليها شويه أكثر...وافقت..روحت البيت نقيت
بدله حلوة و جهزت نفسي و نزلت...رحت بدري لأنه بحب اروح أي معاد
بدري علشان اضبط التراييزة و كل حاجه...المكان ده أنا بحبه تقليدي و قديم
زي ما ورد كانت بتقولي...بس فيه دفء في المكان بيحتويني بحسه كده بيضلل
علي روحي...أنا بخاف من الأماكن الجديده مبجهاش...مبحسش أنه بيني و
بين الأماكن الجديده ألفه...جت جنه دخلت سلمت عليها و قعدت
-ازيك اخبارك ايه يا أستاذ أحمد؟!

-بصي انا مبحبش الرسميات و لا المجاملات...فتقدري تقولي أحمد عادي و
أقلك يا جنه...لو مفيش مشكله
-اكيد مفيش مشكله عادي...المكان جميل جدا علي فكره....أنا اول مره أجي
هنا

-انا علي طول بقعد هنا من أيام الجامعه كمان
-شكلك زبون مهم بقي

-هههه...مش حكاية زبون مهم...بس انا بحب اقعد في مكان معين...محبش
أغير الأماكن كثير

-لأ المره الجايه أنا اللي هأعزمك في مكان جديد...لازم تجدد و تغير كده
-حاضر اتفقنا

أتكلمنا كثير...عرفت شويه عن شخصيتها...بدأت أرسم جزء من شخصيتها...
المرادي قررت أنه الأعجاب ميخلنيش أغفل او مشفش العيوب...زي كل مرة
و قررت ادور علي العيوب...هي مدلعه...تقريبا كل طلباتها مجابه...حياتها
سهله بسيطه بلا مشاكل تقريبا...حياتها بين الشركه بتاعه باباها و النادي و
الصحاب...مشفتش في الكلام ده عيوب أو مشاكل...حتي لو فيهم مش أسباب
تخليني مقربش منها...قررت أنه محتاج أدي نفسي وقت أكبر علشان أتعرف
عليها...و أني اخرج معاها مره أو اتنين علي الأقل قبل ما أقرر أني أتكلم معاها
في أي حاجه

حاولت المرادي احكم علي الموضوع بعقلي الأول لإنه لو حبيتها فمش هيكون
فيا عقل احكم بيه... هل الحب بعقلك أحسن و لا بقلبك... محدش عارف بس
في الحالين لو حبيت بجد هيكون الجنان هو طريقتك في الحب و مش هيكون
فيك عقل أصلا... الحب درب من دروب الجنون... مفيش شك.

جنه كلمتني بتعزميني علي العشا و نتقابل وافقت طبعاً و قلت فرصة أحاول
أعرف أكثر عنها عن شخصيتها و حياتها...قالتلي علي مكان جديد وافقت...و
قلت اجرب... مرحتش ببدله اخترت البس لبس كاجوال... لإنه ده مش مقابله
شغل بعكس حجه اول مرة علشان اعزمها... كمان انا محبش الرسميات... انا
كانت مشكله عندي اول مرة البس بدله كانت حقيقي مكتفاني... مع الوقت
اتعودت عليها بس اعتياد المضطر... روحت بدري قبلها كعادتي في اي معاد..

. قعدت و استتيتها المكان الوانه مبهجه....حاولت احس بألفه في المكان... و بصيت علي الترابيزات حواليا فيه الي قاعد مع صحابه...و الي اسره من اب و ام و طفل....الي لفت نظري الولد و البنت إلي قاعدين في الترابيزه الي قدامي... كأنهم معزولين عن العالم...تقدر تحس بالحب بينهم من نظرهم لبعض من طريقه حركات أيديهم... ضحكت و افكرتني في كل مره كنت بقعد مع ورد اكيد كان شكلنا كده...و بعدين افكرت و انا بقعد مع روح كنا شبه الاثنين الي هناك دول... واحدة عيونها و ملامحها مليانه حب و الي قدامها حجر تقريبا مبيحسش... اتضايقت لأنه افكرت قسوتي علي روح في بدايه علاقتنا...حاولت ادور علي شبه لعلاقتي بأروي و لقيتها في الي قاعدين... بنت بتتكلم و تحكي و ملامحها و طريقته حقيقي خاليه من أي مشاعر و قدامها ولد قاعد مبتسم ليها عيونه بتلمع حب و مشاعر... قد إيه العيون بتفضح صاحبها...تقريبا كل قصص الحب متشابهه باختلاف اصحابها أو طريقه حبهم.. لكن في النهايه كلهم واحد...رجعت بصيت علي بقيه الترابيزات لقيت اسره ثانيه...بس الأسرة دي تقدر تحس بالحب بينهم و بين الام و الاب و الاطفال... اتمني حياتي مع جنه او غيرها تكون زي الأسره دي...علاقه تخلي اي حد يحس بالحب و الدفء لما يوصلهم حتي...مقطعش سرحاني غير جنه و هي بتقولي اتأخرت عليك

- لا خالص انا كنت بتفرج علي المكان

- عجبك؟

- اه حلو مش وحش

- شفت انه التغير حلو بقي

- مش دايم التغير حلو برضه

- طبعا بس برضه لازم التغيير

- معاكي حق

قعدنا و أتكلمنا حيست أني مشدود ليها أكثر...و اعجابي بيها زاد...قررت أنه في المره الجايه الي هنتقابل فيها هاطلب منها الأرتباط و أنه اقرب أكثر منها...ليه مش المرادي معرفش...يمكن حبيت اعرف عنها أكثر...بس تقريبا الثالثه تابته كده...اتفقنا نتقابل بعد اسبوع....هي قررت تختار المكان برضه علشان التغيير...عربيتي باظت قبل المعاد بيوم و اتحجرت في الصيانه...كلمتها علشات أعتذر ليها بس هي قررت تعدي عليا تاخدني....محبتش أرفض علشان انا كنت عايز أقرب منها و دي بالنسبالي فرصه برضه.....عدت عليا قبل المعاد كنت جاهز و لابس كاجوال...و هي لابسه فستان بسيط و جميل كالعهاده...قالتلي انها بتحب الفساتين خصوصا لو مش خارجه مع صاحبها او خارجه تتعشي حتي لو لوحدها...ركبت عربيتها نضيفه جدا و فاضيه و منظمه....بعكس عربيتي الي مقلوبه كلها علي بعضها...انا فيه حاجات كثير مبحبش فيها النظام....بحس بأني مش مرتاح لو الحاجات دي منظمه....ركبت و بدأنا نتحرك....الطريق كان زحمه و جنه قالتلي

-معلش الطريق زحمه حاجه رخمه اوي

-انا شايف الزحمه مش حاجه تخنق كده

-هو انت بتستمتع بالزحمه؟!

-لا مش حكايه أستمتع بس الزحمه بتكون أوقات ممتعته

-ازاي بقي؟!

-يعني بتسرحي بتفكري بتراقبي الطريق و الناس حواليلي..بتاخدي بالك من تفاصيل بتكون تايهه منك اوقات كثير

-هههه ياه دي الزحمة طلعت جميله اهي
-مش حكاية جميله بس هي فرصه حلوه للتفكير و انك تدققي في التفاصيل
-انت غريب

-ازاي؟!

-يعني شايف معظم الحاجات بطريقه مختلفه...الزحمة شايفها فرصه للتأمل.
..بتميل أنك تبقي لوحدة زي ما قلت...بتحب الأماكن القديمه...بتحب تقعد
في مكان واحد مبتحبش التغيير...يعني فيك حاجات تقليديه بس بطريقه
غريبه

-و دي حاجه حلوة و لا وحشه بقى

-لا حاجه حلوه جدا...بصراحه عجباني شخصيتك

-و أنا كمان معجب بشخصيتك برضه

سكتنا لحد ما وصلنا المطعم...حسيت أنه قلبي مرتاح و أن مال لجنه...و
مممكن تكون هي كمان معجبه بيا....ركزت في عيونها لمحت فيها الأعجاب...
ارتحت نفسيا و قررت أنى أفاتها في الموضوع بس بعد ما نخلص العشا...مش
حالب أبقي مزعج لو رفضت أكيد هتتضايق و تقوم..و أنا مش هاخيلها تمشي
او تسبب المكان فجأة....مبحبش ألخبط لحد حاجه هو مخططها...و هي
مخططه أنها تيجي و تتعشي...و أنا مش هأبوظ التخطيط ده....خلصنا العشا.
...طلبت الشيك و جيت أدفع...لقيت جنه بتسألني

-هو انت ليه كل مرة بتدفع؟!

-بصي هو انا بحس أنه عيب أكون مع بنت و أسيبها تدفع...يعني يا أدفع أنا
يا كل واحد يدفع لنفسه لو هي مش عايزة أدفعها يعني
shopping- ده أنت لقطه أبقي تعال معايا و أنا بعمل

- ههههه و أنا موافق

حسيت أنه عايز أقولها أنه أقرب منها و نرتبط إذا الدنيا مشيت ما بينا بقي
قتلتها

-جنه انا عايز أقلك علي موضوع
-اتفضل

-انا معجب بيكي و معجب بشخصيتك...و كنت عايز فرصه أنه أقرب منك

-و أنا كمان بصراحه معجبه بيك و موافقه علي طلبك ده

فرحت و قلت كويس انا بدأت أطمئن للعلاقه دي...جنه روحطني البيت...كويس
أنه العربيه مش معايا علشان قدرت أتكلم معاها أكثر.....اتفقنا تكلمني تاني.
.. و تاخدي النادي و تعرفني علي أصحابها يعني تعرفني بشكل أعمق علي
حياتها و كل حاجه و أزاى بتقضي يومها....و افقت طبعاً لأنه دي فرصه حلوة
ليا برضه...عدي أسبوع و لقيت جنبه بتقلي إذا فاضي النهارده هتقابل مع
صاحبها في كافيه و ادتني العنوان...قررت أروح لأني المرادي عايز العلاقه دي
تنجح...فحاولت اعرف كل حاجه عنها قبل ما يكون بينا أي حاجه....معرفش
ده صح و لا غلط...بس انا كنت بتحكم في مشاعري و بسيبها واحده واحده
مع جنبه...كل ما أعرف تفصيله من حياتها أسيب مشاعري شويه...مممكن
ميكونش ده حب أصلاً....مظنش لأنه لو مكنش حب فهو علي الأقل أعجاب
هيقرب بحب لو قربنا و ارتحنا لبعض....يمكن دي كانت الحقيقه أو ده الي
بحاول أقنع نفسي بيه...بس أنا كنت مرتاح مع القرار ده....روحت و قابلتها و
كانت مستنياني قدام المكان....دخلت سلمت علي صاحبها عرفتهم بيا...قعدت
معاهم معرفش ليه مرتحتش في القعه دي مش لعب أو لمشكله فيهم...
بس أنا كده مبحبش التجمعات كبيره أو صغيره...مبحبش الاختلاط بزياده مع

الناس... ده عيب فيا... أنا معترف بس مش بأيدي... حقيقي بتخفق بأبقي عايز
اقوم و أمشي بعد أول ربع ساعه من أي تجمع مع ناس.... جنه حسنت أني مش
مندمج... كويس أنه حد يحس بالتفاصيل اللي بتعملها لما بتكون مش مندمج
أو زهقان... زي أنك تفتح الموبايل تقلب فيه... تبص في الساعه... تقوم كل شويه
تعمل مكالمه لأي حد.... قربت مني و قالتلي صحابي مش عاجبينك؟!
-لا المشكله مش في صحابك و لا في المكان مع أنه غريب بالنسبالي
-أمال المشكله في أيه؟!
-انتي قلتي قبل كده أني غريب... فأنا للأسف مبرحتحتش في التجمعات
-طيب خلاص متضايقش شويه و أنا و أنت هنمشي و لا ترعل نفسك
-انا مش زعلان أنا عايز أقعد معاكي مش معاهم
-خلاص يبقى نقوم نقعد علي تراييزة تانيه
-طب و هما؟!
-لأ عادي محدش هيضايق يعني
-تمام خلاص خيلنا نقوم نقعد بقي
-ماشي تمام
فعلا جنه أستأذنت و قمنا من التراييزة و قعدنا لوحدا
-ها مبسوط كده؟!
-حد يبقى مع الحلو ده و مبيقاش مبسوط؟!
-ههههه أنت بكاش أوي
-ابدا و الله انا مبحبش المجاملات و قلتلك ده قبل كده
-يعني اصدق كل كلامك؟!
-لو كلامي مش صادق مش هأقوله أصلا

-ماشي يا سيدي صدقتك

-أنا ممكن أسألك سؤال شخصي؟!

-أفضللي طبعاً

-هو أيه السلسله الي أنتي لابسها دي و ده أسم مين؟! و أسفه علي السؤال

-لأ عادي السلسه دي تخص بنت أعرفها كانت أظهر حد أنا قابلته في الدنيا

دي...حبتني و انا كنت حمار...و السلسله دي آخر حاجه باقيه منها

-سبتوا بعض ليه؟!

-لأ هي ماتت الله يرحمها

-أنا اسفه بجد لو فكرتك بالموضوع ده

-لأ عادي انا عمري ما أنسي روح

-جميل أنك وفي للناس الي تعرفها في حياتك

-روح كانت حاجه مختلفه يمكن تكون هي السبب في أني عايش دلوقتي

-ياه للدرجادي؟!

-عارفه لما تكوني متدمره من كل حاجه و يجي حد يلمك و يساعدك كده...

كأنه حد بيزرع ورده في أرض و يمشي و الورده تكبر...أهو ده الي حصل معايا

بالظبط

-أنت جميل أوي

-ههههه ده ليه؟!

-أنتك تفضل شايل جميل حد بالطريقه دي مش حاجه كل الناس بتعلمها

-معرفش بس أنا مش شايف أعترافي باللي هي عملته ده حاجه أستاهل الشكر

عليها

-طيب ممكن سؤال ثاني؟!

-اسئلتك كترت كده
 -مضايق؟!
 -لا بهزر طبعا كمل
 -أنت حببت قبل كده؟!
 -أه مرتين
 -مممكن أعرف ليه مكملتوش
 -بصي هي أسباب كتير بس خليني أفلك النصيب كفايه...الكلمه دي بتلخص حاجات و حكاوي كتير أوي
 -مممم...ماشي
 -و أنتي حبيتي قبل كده؟!
 -اه مره
 -و النصيب برضه؟!
 -لأ أنا هأطلع أحسن منك و احكيلك
 -هههه ماشي احكي
 -أنا كنت في الجامعه..عارف الحب الأول الي بتسيب كل مشاعرك فيه...
 بتسيب الحب يمشيك من غير أي حسابات أو تفكير...ساعتها لما بريق الحب و زهوته بتروح...ساعتها بتتفاجئ بالحقيقه...يا تقدر تقبلها يا للأسف متقدرش بقي...و أنا للأسف أكتشفت أني مع أنسان مستغل...باصص للفلوس...باصص أني فرصه...باصص أنه لازم يستغلني...و بعد ما ياخد مني الفلوس و أنا زي الهبله فرحانه...يروح يخطب حد تاني...بفلوسي الي كان بياخدها مني عيطت جنبه و مقدرتش تمسك دموعها
 -هو انتي لسه بتحببيه?!

-لا طبعاً...بس أحساس أنه انت مضحوك عليك و أهبل ده بيضايق...انا بعيط علي خييتي بس

-طيب متعيطيش...الناس حوالينا...هيقولوا أنه أنا السبب و مزعل قمر زيك..
يرضيكي الناس دي تشتمني في سرها يعني...و بعدين العياط مش لايق عليك
-حاضر هأبطل أعيط أهو

و بدأت تمسح دموعها و تعدل شعرها و تتمالك نفسها

-أقلك علي حاجه تعالي ندخل سينما دلوقتي

-دلوقتي دلوقتي الساعة ١٢؟!

-اه يلا بينا...ايه المشكله

-ماشي و أنا موافقه

-تمام يبقي يلا بينا بقي

قمنا مشينا و رحنا السينما...نسيت جو السينما و شكلها من آخر مره كنت فيها مع ورد...ساعتها كنت قررت أبعد عن حاجات كثير بتفكرني بيها...منها السينما اللي كنا بنروحها كل أسبوع...بس معرفش قررت ليه أروح مع جنه..
هل عايز اثبت لنفسي أنه فعلا نسيت ورد و مبقتش فارقه معايا؟!...مممكن أكون نسيت مشاعري و حبي ليها...بس أكيد مش هنساها يعني.....دخلنا السينما...مركزتش في الفيلم أوي قد ما كنت مركز مع جنه و أحاول أشوفها بتبتسم أو مودها يتغير بس....شكلي بدأت أحبها و مشاعري تفلت مني...من غير أي حساب بقي...قطعتني و أنا مركز فيها و قالتلي

-هو الفيلم مكتوب علي وشي؟!

-لأ...بس مش يمكن أنتي أحلي من الفيلم

-هو انت بتجيب الكلام ده من فين؟!

-الكلام ده بأجيبه من وشك كل ما أبصلك
-طيب كفايه كلام حلو و النبي علشان انت كلامك يجنن بصراحه...و قربت
تاكل بعقلي حلاوة خالص
-ههههه حاضر...بس ياريت بس متعيطيش تاني...مش كل مره هنروح سينما
في نص الليل بقي
-يعني هو لازم أعيط علشان نروح سينما سوا؟!
-أكيد لأ متعيطيش بس و أنا هاوديكي سينما علطول
-ههههه ماشي و أنا موافقه
كملت الفيلم و خلصناه و روحنا...و أحنا مروحين جنبه قالتلي أنها أتبسّطت
و أنه كان يوم حلو أوي أنا كمان قتلها أنه كان يوم حلو جدا...روحت يومها
و أنا بفكر في جنبه....شكلي حبيبتها خلاص...معدش ينفع أتحكم في مشاعري
في الوقت ده....مستغرب أنه علاقتي بجنبه مليانه تفاصيل و مقابلات بعكس
العلاقات اللي قبلها....يمكن بحكم سني...يمكن بحكم الظروف....معرفش بس
أنا كنت محتاج وقت أني أعرف كل حاجه عنها قبل ما مشاعري تسوقني....
لقيت جنبه بتتصل رديت عليها
-عايزه أقلك أنه أنا اتبسّطت جدا النهارده...و مكنتش عايزة اليوم يخلص
-و أنا كمان و الله كنت فرحان جدا...متقلقيش اليوم هيتعوض كثير صدقيني
-فاضي بكره الصبح اعدي عليك اوديك النادي؟!
-أه فاضي هستناكي تعدي عليا
بحب أنه أركب معاها عربيتها...بيديني فرصه أكثر أنه أتكلم معاها....علشان
كده مرفضتش أنه توديني النادي...صحيت الصبح فطرت...قعدت أدور علي
حاجه تنفع أروح بيها ملقتش...معنديش هدموم تنفع نوادي تقريبا...فلبست

كاجوال كالعاده...جنه أتصلت و نزلتها...سلمت عليها و ركبت
علشان نجري سوا يعني training suite -أيه ده أنا قلت أنت هتيجي ب
-لأ أنا دورت و ملقتش بصراحه عندي
-ايه ده أزاى؟!
-يعني أنا مقاطع النوادي مكنش ليها لازمه بقي...أو مفيش وقت و معنديش
حد أروح معاه
-لأ أنا موجوده أهو و هأروح معاك
-اتفقنا ماشي
جنه مشيت بالعربيه ووصلنا النادي...شغلت في العربيه أغاني فيروز...و كأنها
عارفه أني بحب فيروز...أو أنه فيروز هي رمز الرومانسيه و الحب...أول ما
بتحب بتروح تسمع فيروز...بتنجرح تسمع فيروز...عليت الصوت
-أنت بتحب فيروز؟!
-مين ميحبش فيروز يعني....فيروز دي أيقونه الرومانسيه
-أنا بحبها أوي...بعشقها
-و أنا كمان بحبها جدا
سكتنا و كأنه أاتفقنا سوا أنه مفيش صوت يعلي علي صوت فيروز...وصلنا
النادي...قعدنا سوا...اتكلمت جنه و قالت
-أنا بحب المكان ده من النادي بعيد و هادي شوية عن الناس و الزحمه....و
قت أكيد هيعجبك لأنه أنت مبتحبش الاختلاط أوي
فيه جمل و تصرفات بسيطه بتحسك أنه اللي قدامك أنسان بيقدرك أو عارف
دماغك....حتي لو هي عملت كده مجامله...بس ده حسسني انها مقدراني..
..بخلاف علاقتي مع أروي الي مكنش فيها أي تقدير ليا...تلفوني رن بصيت

لقيت ورد بتتصل و كأنها بتفكرني أنها لسه موجودة و مستنياني
-مش هترد؟!

-لأ تلفون مش مهم

قلفت التلفون و أتكلمت مع جنه شويه بعدين سألتني

-هو انت فين أهلك؟! عمرك ما جبتي سيرتهم...مبشوفكش بتكلم حد غير

أخوك أيمن او بتتكلم عليه

-انا والدي ووالدي ماتوا في حادثه عربيه لما كنت في أولي ثانوي و أنا كنت

معاهم

-ياه...أنا اسفه أني سألتك

-بطلي أسف ملوش لازمه يعني...أنا لو مضايق او زعلت هأقولك

قعدنا شويه و فطرنا في النادي و جنه روحتي...قررت أتصل بورد أشوفها كانت

بتتصل ليه

-ازيك يا أحمد؟!

-الحمدلله و انتي؟!

-كويسه...أنا أتصلت أقلقك أني نازله مصر أحضر فرح بنت خالتي...و قلت

أكلمك و أشوفك...لو فاضي

-لأ عادي أنا فاضي هتيجي أمتي؟!

-آخر الأسبوع ده

-تمام تيجي بالسلامه

قفلت مع ورد....فكرت أني محتاج أخذ خطوة جد مع جنه...مظنش أني محتاج

وقت أكثر من كده...مسكت التلفون و أتصلت بيها

- جنه أنا بحبك و عايز أتجوزك...أجي أخطبك أمتي؟!

-ههههه ايه ده؟! مش بقلك أنك غريب

-يعني مش موافقه؟!

-لأ أنا استغربت أنك دخلت في الموضوع علطول كده...أنا موافقه طبعا...أنا

كمان بحبك...و هأبقي أسعد أنسانه و أنا معاك

-تمام حدديلي معاد مع باباكي و مامتك و انا هأجيب اخويا و نيجي...اتفقنا؟!

-سريع أنت أوي....هههه..حاضر من عيوني

-تسلملي عيونك

قفلت مع جنه كلمت أيمن حكتله....فرح أوي و قالي مبروك و مستني تلفونك

نروحلهم....بعدين معرفش ليه فجأه افكرت مصطفى...هل أنا كنت محتاج

ناس أشارك معاهم فرحتي و أكتشفت أني لوحدي...معرفش بس حاولت ادور

علي رقمه و لقيته....يارب ميكونش غير الرقم بس...اتصلت رن كتير في الآخر

فيه حد رد

-ألو مصطفى معايا؟!

-أيوه مصطفى مين معايا

-أنا أحمد حسن فاكرني؟!

-ياه...أنا زعلان منك لأنك بعدت و مفكرتش تسأل علي صاحبك

-أبدا و الله بس انا سافرت و الدنيا لهتني...فاضي أمتي أشوفك؟!

-النهارده...دلوقتي كمان لو عايز

-خلاص اتفقنا كمان ساعه في نفس الكافيه اللي كنا بنقعد فيه أيام الجامعه

-ياه....لسه زي ما أنت

-ههه..اه هستناك متتأخرش كالعاده

-لأ متقلقش هاجي بدري

قفلت معاه و مكنتش لحقت غيرت هدومي....نزلت ركبت العربيه و رحت
 المكان...شكلي جيت كالعادة بدري....مصطفي مبيتغيرش أبدا...دايما متأخر...
 شويه و لقيت مصطفي داخل...بيضحك و مبتسم كعاداته دايما...تبص لضحكته
 تضحك...كويس أنه الخصله دي متغيرتش فيه...دخل حضني و باسني
 -انت عارف اني مبحش البوس و الأحضان يا مصطفي
 -عارف بس بقالي سنين مشفتكش....و لا لازم ترخم عليا كالعادة
 -هههه طيب تعالي اقعد
 -اخبارك آيه و اخبار الدنيا آيه؟!
 -الحمدلله أهو بقيت راجل مسؤل و متجوز و مخلف كمان
 -ما شاء الله ده انت خلاص عديت بقي
 -ههههه....حاجه زي كده...مش عايز تعرف أتجوزت مين؟!
 -أكيد أميره.....هو أنت وراك حاجه غير أميره
 -كان نفسي أكسفك بس معرفتش...اه أميره كعادتك عارفني كويس
 -أصل كان صعب قصه الحب دي تنتهي من غير جواز
 -لأ هي أنتهت بالجواز
 -أزاي؟!
 -معرفش بس بعد الجواز مبقاش بينا الحب و الشغف بتاع زمان...تقريبا كل
 واحد بيضحك علي الثاني أنه لسه موجود
 -آيه الكلام ده؟!
 -اه و الله دي الحقيقه...المهم انت أخبارك آيه
 -أنا الحمدلله..عندي مشروع خطوبه
 -حد أعرفه؟!

-لأ بنت أسمها جنه

-طول عمرك نصيبك في الأسامي الي بتشدد جنه...ورد..سكت شويه و قالى روح.
...كويس أنك لسه لابس سلسلتها لسه...كنت عارف أنك عمرك ما هتقلعها

يعني

-مقدرش أقلعها

قعدت أنا و مصطفى نتكلم و أتغدينا سوا قعدنا كتير يمكن خمس ساعات أو أكثر و عدته أعزمه علي الخطوبه و قمنا مشينا....منكرش أنه كلام مصطفى قلقتني...هو فعلا الحب ممكن يموت بعد الجواز....علاقه حب زي مصطفى و اميره محدش ممكن يصدق أنه الحب الي بينهم يموت أو ينتهي....و يبقوا مكملين حياتهم علشان مش عايزين ينهوا العلاقه علشان ولادهم أو الي كان بينهم...هي الأيام ممكن تنهي الحب فعلا حتي لو أنتهي بالجواز....فضلت طول الليل أفكر موصلتش لسبب

جنه كلمتني تاني يوم أتفقت مع والدها ووالدتها علي معاد أنه يوم الخميس الجاي هاروح ليهم و أدتني عنوان بيتهم....أنا بتفائل بيوم الخميس بفرح لما بيجي...ليه معرفش...بس أي حاجه مهمه عندي بحب تكون يوم الخميس.
...كلمت أيمن قتلته...و أتفقت معاه هيجيلي البيت و نطلع سوا...جه يوم الخميس...قررت ألبس بدله...أو بمعني أصح أيمن لبسني بدله غصب عني و قاللي لازم ألبس بدله و أنا رايح....وصلنا تحت البيت كلمت جنه قتلها اني تحت...و قالتلي أطلع....فتحتلي الباب دخلت...بيتهم كان حلو...و حلو بالنسبالي أنه محستش بالغربه الي بحسها لما بدخل أي مكان غريب
-كنت خايفه متلبسش بدله و انت جاي النهارده كعادتك
-لأ أيمن قالى لازم ألبسها فسمعت كلامه

-انا لازم اشكره بقي

ضحكنا و أستاذت و جه باباها و مامتها....قمت سلمت عليهم كانوا كويسين جدا....حسيت أني وسط أهلي فعلا....أتفقنا علي كل حاجة....الموضوع كان سريع بطريقه مبهجة.....أتفقنا نعمل الخطوبه في بيتهم علي الضيق الأهل و الصحاب بعد أسبوع...علي ما نكون أشرينا الخاتم و الشبكه...تاني يوم كلمت جنه و كنا بنشترى الخاتم و الشبكه...معرفش بس انا حبيت الوقت يمشي و يجري....علشان تكون جنه خطيبتي و مراقي....مكنتش عايز أي تأخير أو مشكله....و الحمد لله الدنيا كانت زي الفل....و الاسبوع مشي كان بطئ شويه بالنسبالي...لأنه الوقت لما بتفضل تحسبه بتحسه مبيمشيش....يوم الخطوبه جهزت نفسي...لبست البدله الي جنه أختارتها....و هي لبست الفستان الي أنا أخترتة برضه...كان شكلها فيه يهبل....كان ذهبي و كان لونه قريب من لون شعرها....تحس أنه شعرها و الفستان جزء واحد كده...مصطفي و أيمن كانوا موجودين و اليوم كان جميل كنت فرحان أوي و جنه كمان و ده كان باين في عيونها يعني....روحت البيت لقيت رقم متصل بيا كتير....و باعتلي رساله بصيت فيها...لقيتها ورد بتقلي ده رقمها و أنها هنا في مصر...أتصلت بيها -اسف بس مكنتش سامع التلفون و لا كنت مركز معلش

-خير فيك حاجة

-لأ كانت خطوبتي بس

-نعم...أيه و أزاي يعني?!

-خطوبتي عادي يعني

-أه علي رأيك يعني عادي....طيب و أنا ممكن أعزمك أنت و خطيبتك

سكت شويه و بعدين قتلها أه موافق مفيش مشكله....يمكن حبيت أقول

لورد أني أهو معايا حد بيحبني...معايا حد مش هيسيبني..مش عارف بس
حسيت أني برضي جزء من غروري فأني أوافق....أتفقت معاها علي المعاد و
المكان

أتصلت أبلغ جنه أنه فيه واحده صاحبتني عزمانا سوا بمناسبه الخطوبه....
جنه كانت ذكيه....قالتلي همشيها صاحبتك و هأجي معاك...ضحكت و قتلها
ماشي

جه اليوم الي أتفقت عليه مع ورد....عديت علي جنه نزلت بفستان شكلها
فيه يهبل كالعادة...معرفش ليه بس جنه لما بتلبس الفساتين بتحسها كأنه
الفساتين دي متصممه ليها هي و بس...يعني مينفعش حد يلبس فستان و
يكون زي جنه و يكون جميل فيهم كده....وصلنا المكان لقيت ورد هناك و
كأنها كانت بتعد الثواني علشان تشوف جنه....دخلنا قعدنا....سلمت علي جنه
و قالتلنا مبروك...أدت جنه هديه و قالت دي حاجه بسيطه بمناسبه الخطوبه.
...متكلمناش في حاجه غير كلام المجاملات السخيف و كلام زي اخبارك...بتعمل
ايه....بتعملي أيه...كلام مكنش ليه لازمه...يمكن كان غلط أني وافقت علي
العزومه دي من الاول أصلا.....خلصنا أكل و طلبت أحاسب ورد مرضيتش و
قالتلي ابدأ انا الي عزماكوا....و أحنا مروحين جنه سألتني

-غريب أنكوا مكملتوش...أنتوا تقريبا زي بعض...طبعاكم تحسها هي....
ذوقكم قريب أوي....حتي تقريبا نفس الأماكن شكلكم بتحبوا تقعدوا فيها
-بصي الموضوع مكنش الطباع و لا الذوق
-أمال كان أيه؟!

-كان ببساطه أنه فيه حد أتخلي عن حد ثاني و سابه
-وواضح كده أنه مكنش أنت الحد ده

-أكيد مكنتش أنا
 -و لسه بتحبها أو بتفكر ترجعها
 -لو حاجه من دي مكنتش زماي قاعد معاكي دلوقتي
 -أنا بحبك أنتي و بس
 -و انا كمان بحبك أوي
 بوست أيدها و طبطبت عليها....جنه كانت عاقله جنب أنها ذكيه....و ده اللي
 شجعني أنه اخدها و نروح لورد لأنه حسيت أنه مش هتكون مشكله أو أزمه
 بينا و الحمد لله الموضوع عدي علي خير....أو كده كنت فاكـر
 ورد أتصلت بيا متأخر يومها رديت عليها
 -بص انا معرفش أزاى بس مش ملاحظ أنه جنه عكسك خالص
 -لأ الحب مفهوش حد عكس الثاني و هي مش عكسي
 -أحمد أنت عمرك ما حبيت الفساتين....عمرك ما حبيت الخروج و الفسح و
 لا العلاقات....أنا أستغربت أنك عارف أسامي صحابها....من أمتي العلاقه بينك
 و بين حد كان فيها صحابها و الفسح و الخروج ده؟!
 -و الله دي حياتي و أنا حر برضه...صح؟!
 -صح و أنا أسفه علي العموم أبقي خيلنا نتكلم كل فتره أطمـن عليك
 -حاضر سلام
 قفلت التلفون كلام ورد ضايقني.....بس لفت نظري لحاجه أنا ناسيها...هل أنا
 حبيت جنه فعلا....و لا جنه كانت شكل حياه عايز أبنيتها?!...جاوبت علي
 نفسي أنه لأ أنا بحبها...محبـتش أفكر في الموضوع كتير لأنه بصراحه الشك دخل
 قلبي....يارتني ما عرفت جنه علي ورد....يارتني قفلت صفحه ورد دي خالص.
 ...كنت خايف أنه كلام ورد يطـلع صح و أفوق ألاقـي نفسي...ظالم نفسي و ظالم

جـنه معاـيا...كـلام مصـطـفـي وورد رعبـني مش خوفـني بـس...أخاف أكون فعـلا
مـبـحـبـش جـنـه...أو الحـب الـي بـينا يموت بعـد الجـواز مش يكـمل و يكـبر أكـثر
مـحـاولـتـش أفـكر فـي المـوضـوع و أنه أهـتم و كـذبت الكـلام ده كلـه...كـذبـته و
أقنعت نـفـسـه بـيه

لـاحـظـت جـنـه بـدأت تـتـغـير...تـتـغـير بـطـريـقـه أنها تـبـقـي شـبـهـي...تـقـلـدـنـي...كأنـه
مـقـابـلـتـنا مـع وـرد و صـلـتـلـها المـعـنـي ده...أنا كـنت فرحـان فـي الأول لأنـه أحـلـي حـاجـه
أنـك فعـلا تـلـاقـي الـي بـيـحـبـك شـبـهـك...بـس كـنت قـلـقـان لأنـه صـعب تـغـيـر الطـبـاع و
مـهـمـا جـنـه تـعـمـل..أكـيـد هـيـجـيـلـها و قـت و مـتـقـدـر ش...و أخاف سـاعـتـها بـيـقـي اللـوم
عـلـيـا...أنـه أنا كـنت فرحـان بـتـغـيـر هـا ده...أـتـكـلـمـت مـعـاها و قـلـتـلـها أنه مش لـازـم
تـبـقـي نـفـس طـبـاعـي مش لـازـم تـقـلـدـنـي...أنا حـبـيـتـها بـطـبـاعـها و طـريـقـتـها هـي...مـش
عـلـشـان هـي شـبـهـي...بـس لـلـأسـف مـكـنـتـش قـادـره تـقـنـع أو تـصـدقـني تـقـرـيـبـا..
..حـاولـت أسـرـع عـلـي قـد ما أقـدـر الجـواز...و بـنـفـس لـهـفـتـي عـلـي أنه يـجـمـعـنـي
بـجـنـه بـيـت كـان بـرـضـه جـنـه بـتـزـيـد أنها تـبـقـي شـبـهـي...فـرحـان بـكـده...بـس قـلـقـان
مـعـرـفـش مـن كـلام مصـطـفـي وورد و لا لأنـه صـعب تـغـيـر الطـبـاع و جـنـه هـيـجـيـلـها
و قـت و كل التـغـيـير ده يـروـح و تـكـر هـنـي

فـي أخـتـيار العـفـش نـفـسـه كـانـت جـنـه بـتـخـتـار ذوقـي...تـخـتـار الحـاجـه الـي هـتـعـجـبـنـي..
..حـتـي ألـوان الشـقـه...حـتـي كل حـاجـه...كأنـها مـسـلـوبـه الأـرـادـه...بـتـرضـيـني و بـس..
...و ده مـكـنـش عـاجـبـني...اـتـصـلـت بـيـها فـي يـوم و طـلـبـت مـنـها أنه عـايـز أـتـكـلـم
مـعـاها فـي مـوضـوع مـهـم...حـاولـت أخـتـار كـافـيـه جـديـد بـس جـنـه رـفـضـت...كأنـه
اـتـبـدـلت مـكـنـش عـادـتـها تـكـره تـغـيـير الأمـاكن زـي ما انا بـكـره...مـقـدـرـتـش أمـسـك
نـفـسـي و لا أحـبـس الكـلام أول ما شـفـتـها
-جـنـه انا حـبـيـتـك بـطـريـقـتـك بـشـخـصـيـتـك...مـحـبـتـكـيـش عـلـشـان أنـتـي شـبـهـي...و

مش عايزك تبقي شبيهي
 -بس أنا مش عايزة نبعد أو حبنا يروح
 -و ده عمره ما هيحصل....و أنك تبقي شبيهي دي مش حاجه ترضيني...أو
 تخلي الحب اللي بينا يكبر...أنا عايزك بشخصيك و طريقتك أنتي
 -يعني مش هتسبني
 -و الله ما هأسيبك....بس متغيريش ارجوكي
 -حاضر متقلقش
 -اوعديني؟!
 -اوعدك و الله
 كنت فاكّر أنه الكلام ده خلاص هيقل الموضوع و يغيره....بس للأسف كآني
 كنت بكلم نفسي....اتجوزت أنا و جنبه....محبّتش تعمل فرح علشان عارفه آني
 بكره الأفراح....كان كتب الكتاب في المسجد و بعدين طلّعنا علي المطار علشان
 نسافر ماليزيا....كان أسرع فرح أتعمل تقريبا....ماليزيا مكنتش أختيار جنبه..
 كانت أختياري...مبقاش فيه اصلا حاجه أختيار جنبه....كل حاجه أنا بختارها..
 ..حتي لو مكنتش موجود...جنبه بتختار اللي أنا عايزة....أنا كنت مبسوط و
 فرحان و قررت خلاص أوافق علي ده و متكلمش فيه تاني...يكن كنت غلطان
 بس وافقت...قضينا شهر العسل كان احلي شهر في حياتي كلها...كل أيامي
 مع جنبه كانت احلي أيام....كانت جنتني فعلا...قبل ما نرجع مصر قررت أنه
 أعرفها السعاده اللي بقيت فيها معاها...نزلت لوحدي جبّلتها خاتم و قصدت
 أتاخر عليها شويه و مردش لما تتصل...أول ما وصلت كانت مضايقه جدا و
 مش طيقاني و قالتلي
 -كويس أنك فكرت تيجي...كنت فين كل ده؟!....لحقت تزهق مني...من قبل

شهر العسل ما يخلص

-ملحقتش ازهق و لا عمري هأزهق من جنتني....أنا كنت بره بجيب ده
نزلت علي ركبتني و طلعتها الخاتم....حاولت أفلد الأفلام...هي شافت الخاتم
فرحت و ابتسمت و حضنتني
-بس مكنش ينفع أنك تسيبني قلقانه عليك كده....دي أحلي هديه في حياتي..
-بس أنت قلقنتني عليك...كنت خايفه أنك تسيبني
-يعني هأسيبك و احنا في بلد تانيه ده حتي مينفعش...أسيبك في مصر حتي..
و ضحكت

بس كأنه الكلمه دي فتحت باب جديد للخوف جوه جنه
-يعني أنت ممكن تسيبني فعلا؟!
-لأ طبعا حد يقدر يسيب حبه حياته يعني...حد يسيب نفسه عمري ما
هأسيبك
-بجد و لا بتضحك عليا
-و الله ابداء...أنا بحبك و بموت فيكي و بعشقك...عمري في حياتي ما هبعد عنك
-ماشي بحبك أوي
حضنتني و عيطت
-بتعيطي ليه دلوقتي؟!
-علشان بحبك أوي و خايف تسيبني
-و الله ما هأسيبك

مسحت دموعها و خدتها في حضني و نامت.....رجعنا مصر...و جنه مليانه
مشاعر كثير مآثره عليها قلقانه أنه اسيبها....و أنا و الله ما هأسيبها..حاولت
أوصلها بأكثر من طريقه و أقلها أنه اللي بيحب مش يباعد....و انا مش هسيبك

بعد ما لقيت راحتي معاكي....يمكن أنطوائها و قعدتها لوحدي كثير لأنه كنت بفتح شركه خاصه بيا في مجال التسويق و الدعايه أثر عليها....كمان هي قطعت مع كل صاحبها و معارفها و مكنش ده طلبي و لا كنت فرحان بده..بس للأسف جنبه مكانتش بتسمع كلامي...أنا خايف من اللحظه اللي هي هتفوق فيها و تشوف اللي وصلته و تكرهني....الحب ممكن يودي الواحد لسكه تازيه غير شخصيته و غير حياته كلها....أنا خايف من اللحظه دي الحمدلله الشركه أشتغلت و كبرت و في يوم جالي أحلي خبر في الدنيا أنه جنبه حامل....كأنه الدنيا قررت أخيرا تصالحي فجأه...كل حاجه نفسي فيها معايا بس الدنيا للأسف عمرها ما هتديك كل حاجه و لو اخدت كل حاجه أتاكد أنك هتدفع تمن غالي أوي.....يمكن محدش يشوف التمن اللي بتدفعه...قصاد الحاجات اللي الدنيا ادتهالك....بس هي الدنيا كده بتدفع زي ما بتاخذ....و كأنه ميزان مينفعش يميل أي كفه منه....معرفش ليه أفكرت الكلام ده لما حسيت أنه فعلا معايا كل حاجه نفسي فيها....هل أنا كئيب فعلا زي ما أروي كانت بتقول و بخاف أفرح....و لا يمكن من اللي مریت بيه خلاني أحس أنه مفيش حاجه حلوة للأخر....أنا دايما بحاول أبص للنص المليون من الكبايه....دايما ببص للجانب المشرق في حياتي....بس لما الكبايه كلها بقت مليانه لأول مرة في حياتي قلق و خوف

و فعلا اللي خوفت منه حصل....حماتي كلمتني أنه جنبه في المستشفى....جالها زيف...سبت كل حاجه في أيدي و جريت علي المستشفى....جنبه جالها زيف و الحمل سقط....علي قد حزني علي أبني أو بنتي اللي كان جاي...علي قد ما كنت قلقان و خايف علي جنبه...دخلتها و صممت أنه لازم أكلّمها و أطمّن عليها

-متخافيش انا جنبك و معاكي أهو و المهم سلامتک و أنك کویسه
-یعنی أنت مش زعلان؟!

-انا زعلان علشان أنتی تعبانہ....و أنك زعلانہ

-متکذبش علیا....أنا عارفه أنك زعلان و یمكن مش طایقنی یعنی

-أبدا و الله أنتی أهم عندي من أي حاجه....و بعدین هنجیب غیره ان شاء
الله یعنی...بحبك و الله و شدي حيلک علشان تقومي بالسلامه

جنه كانت متدمرة بسبب الي حصل و أنا حاولت أكون جنبها و مكنتش
بسيبها بس للأسف....لما النهايه بتبدأ مبتقدرش توقفها...و تبقي غلطان لو
مقدرتش تشوف النهايه بتقرب أو محستش بيها....و أنا حسيت أنه نهايه
حبي و علاقتي بجنه بدأت....حاولت أمنع ده و أني أكون جنبها علطول...
أحسستها بحبي ليها أوريها قد أيه هي كل حياتي....بس للأسف كل مجهودي
كان بيساوي صفر دايما

حاولت أخلي جنه ترجع لحياتها قبل ما تعرفني....و بعد عذاب رجعت...
رجعت بطريقه أكثر من الأول....أنا مبتقتش بشوفها....بقيت بتقابل معاها في
البيت صدفه....و ده ضايقني...أكيد أنا محتاج وجودها...قررت بعد شهر من
الحال ده أني أتكلم معاها

-جنه انا عارف أنك مضايقه و زعلانہ بس مينفعش كده أنا محتاج وجودك
جمبي

-طب ما أنا أهو موجوده

-موجوده فين كل يوم سهر و خروج و فسح و مش بشوفك

-و الله هي دي حياتي مش عاجبي طلقني

الكلمه صدمتني....خلتني متنح شويه...حاولت أقلب الموضوع هزار...لأنه

أتصدمت من كلامها
 -بطلي هزار بقي أطلقك ايه بس
 -بس أنا مبهرش أنا عايزة أطلق
 سكت مقدرتش أتكلم سبتها و نزلت....بعد ساعه أتصلت قلت أكيد هدبت
 -ايوه يا جنه وحشتيني
 -أنت لاء...أنا عايزة أطلق
 -يا جنه طلاق ايه بس.....أنا بحبك مقدرش أبعد عنك....دي ظروف و هتعتدي
 -حتي لو عدت أنا عايزة أطلق
 -طيب ممكن أعرف ليه؟!
 -بص أنت كنت زي حفرة و أنا وقعت فيها...الوقوع في الحفرة كان حلو و
 جميل و ممتع....بس للأسف لما بتنزل جوه الحفرة...بتشوف المصيبة اللي أنت
 بقيت فيها....و أنا عايزة أطلع من الحفرة
 -انا حفرة أزاى؟!
 -يعني أنا غيرت نفسي و بقيت شبهك و أنا عمري ما كنت شبهك
 -و انا قلتلك أنه مش عايز ده و انتي صممتي
 -كنت مغفله و هبله بقي
 -و ليه منكملش و كل واحد بشخصيته
 -معدش ينفع انا اصلا كأني متغميه و دلوقتي فتحت
 -يعني مفيش أي أمل أنه نفضل سوا
 -مفيش أمل لأني مش طايقه أشوفك أصلا
 -طيب يا جنه حاضر
 الوقت وقف قدامي...كل حاجه وقفت....أتمنيت أنه الكلام ده يكون مش في

وعياها...أتمنيت أكون دي مش جنه اللي انا كنت بكلمها دلوقتى....كنت عارف
أنه اللحظة اللي هي هتفوق فيها من اللي عملته في نفسها هتكرهني...بس
متوقعتش أنه يجي بالسرعه دي أو أنه حتى يكون قرارها الطلاق و الفراق
كلمت مامتها و بابها حكيتلهم حاولت اللي حصل وعدوني أنهم هيحلوا
الموضوع....اتفقوا مع جنه تروح لدكتور نفسي....يمكن تقدر تحكيه اللي مش
عايزة تقولوا لينا....بس للأسف كأن كل محاولاتي مع جنه مكتوب ليها الفشل
جنه صممت علي الطلاق....و أنا مع كل محاولاتي مقدرتش أمتع ده
ووافقت علي الطلاق..اجراءات الطلاق كل حاجه كنت بعملها كأني مغيب....
كأني مش موجود....كأني بحلم....مكنش عندي المرادي رفاهيه أني أقع أو أحزن..
...يمكن مبقتش بحس...يمكن أتعودت....يمكن جنه كانت فعلا شكل حياه
عايز أبينها و محبتهاش....معرفش....لكن الطلاق جه بسرعه اوي
للأسف كأني كل ما أبني حاجه بتقع....معرفتش هو أنا بختار غلط....هو أنا
مش عارف أوصل للي أنا محتاجه وعايزة فعلا....مبقتش قادر حتي أفكر في
الموضوع....حاولت أنسي و قلت كالعاده الأيام هتخليني أنسي...الأيام كفيله
أنها تنسي و تمسح كل حاجه....أو علي الأقل هتخلي أحساسك معدوم ناحيه
الحاجه اللي كانت وجعاك....أخذت قرار أنه أفضل لوحدي لأنه تقريبا كده
مش هلاقي اللي هيكمل معايا لأخر طريقي....و هأمشي طريقي لوحدي....
انا عارف أني هارجع عن القرار ده علشان اليأس عمره ما هيبقي جزء مني..
..عمري ما هيتملكني اليأس و الحزن....بس أكيد برضه القرار ده هيوصلني
للسلام الداخلي اللي بدور عليه لفتره طويله

الدنيا ممكن تراضيك و تديك كل اللي بتعلم بيه حتي لو جه متأخر

و صلت الثلاثين.....من غير حد جنبي....من غير حد معايا...بس برغم ده كنت
وصلت للسلام النفسي الي كنت بدور عليه....حتي لو في آخر الليل خصوصا
ليل الشتا الي أنا مبجوش بتكون وحيد و تفكر في كل حاجه مريت بيها...و
يبدأ الليل يخرج كل احزانك و صراعاتك و تفتكرها....الليل طويل بحس أنه
مرتفع للأحزان.....ييفتحها ألف باب علشان تدخل....بس كنت مرتاح نفسيا
برغم معاناتي لكده....بقت عندي هوايه جديده أني أدخل أي مكان أراقب
وشوش الناس...أتخيل الي بيدور بينهم....أشوف الحب و الحزن و الفرح في
عيونهم....أوقات كتير أسرح في عيون حد قاعد لوحده زي....أقول يا تري أيه
الي وصلهم أنه يقعدوا كده لوحدهم...يا تري قصتهم زي و لا مختلفه شويه.
...يا تري برضه بيكرهوا الليل لما بيفكرهم بوحدتهم.....بس الأكيد أنه كلنا
وصلنا لنفس القرار...أنه نفضل لوحدا

و لأنه طبيعه الدنيا أنه مفيش حاجه بتفضل زي ما هي و كل حاجه دائمه
التغيير....فقراري ده أتغير....و حالي كله أتقلب.... لأنه في يوم و أنا قاعد
براقب عيون و وشوش الناس كالعادة....لمحتها كانت سبحان الخالق العظيم.
.... سبحان من ابداع و صور....العقيق لون شفايفها...الزمرد لون عيونها...
سواد الليل لون شعرها....عاده أول مره أسرح في حد بالطريقه دي...شفايفها
الي لونها أحمر بطريقه تجذبك و لا عيونها الخضري الي يخلوك تغوض فيهم.
...و لا سواد شعرها الي ممكن ينسينك كل حاجه بتفكر فيها....بصلتها كأني
عيل مراهق....نسيت كل حاجه و تنحت و بصيت ليها بطريقه هي نفسها

لاحظتها....و بصت عليا برضه و ضحكت و طلعت روايه و فضلت تقرا فيها....
و أنا ركزت في كل تفصيلها...في الطريقه الي بتقلب بيها الصفح...حركه عيونها
و هي بتقري...شعرها لما بيتحرك وهي بتهز راسها.....ركزت معاها لدرجه أني
حفظت كل تفاصيلها....و زي أي حد مجنون...قمت مفوقتش غير و أنا قدامها
بقلها

- ممكن سؤال؟!

-معلش بس هو مين حضرتك؟! تعرفني يعني؟!

-لأ بس نفسي أتعرف عليك

-انت مش ملاحظ أنك جري أو بجح

-أه بس أنا نفسي أتعرف عليك و أتكلم معاك

سابتني و مشيت طبعا بس مكانتش مضايقه...يمكن بتضحك علي جناني أو
هبلي....حتي لو مش هأشوفها تاني...أنا عملت الي فكرت فيه و كنت عايزة.
...و بس

تاني يوم كنت قاعد في نفس المكان....لقيتها جت....و أنا عقلي طار لما شفتها
برضه...محستش بنفسي الا و أنا قدامها بقلها
-ممكن تديني فرصه؟!

-هو أنا أعرفك علشان أديك فرصه

-اديني فرصه و جربي نتكلم حتي لو الوقت الي بتيجي فيه هنا....أعتبريها
تغيير

-طيب ولو أنا مش موافقه هتفضل تطلب من ده كل مرة

-أكيد لأ مش هاقرفك طبعا

-طيب أنا هديك فرصه زي ما طلبت....بس لو متفقناش...متكلمنيش تاني

- أنا موافق....أنا أسمى أحمد عندي ٣٠ سنة و فاتح شرکه دعایه و تشویق
-أنا اسمي عشق.....٢٦ سنة مهندس دیکور...و عندي مكتب صغیر علي قدي
-طبعا حد زيك لازم ييقي فنان

-هههه شکرا بس انا مش فنانه أوي....انا مهندس دیکور فيه زي کثیر
عجبتني بساطه عشق و تواضعها....و کمان أسماها حلو....تقريبا کده کلام
مصطفي صح أنه ليا نصيب في الاسامي الي بتشد....عشق و أنا شکلي عشقتها
فعلا....بقت کل يوم بتيجي الکافيه بقعد معاها ساعه أو أثنين....نتکلم فيهم
أحکلها عني و تحکيلي عنها...عرفت أنها أتجوزت و أطلقت زي حالتی....سبب
الطلاق أنهم مفهموش بعض....مکنش فيه بینهم تفاهم....هو کان عایزها
یتحکم فيها و یسيطر علیها و هي مکانتش حابه ده....و أنه کان عایزها جاریه
عنده...عرفت أنه اهلها متوفيين و أنها لوحدها برضه....کان بینا تفاصيل کثیر
مشترکه بینا....مجروحین زي بعض...لوحدها....بنحب نقعد في نفس الأماكن
و مبنحبش نغیر المكان الي نقعد فيه....بنکره الشتاء....الدنيا علمت فينا کثیر
و تعبنا....بدأت أنا و عشق نرتبط ببعض اوي....بقیت بحب أشوفها و هي
کمان بقت بتحب تشوفني

قربنا من بعض أوي...تفاصيلنا کلها کانت واحده....کأنه أحنا الاثنين واحد....
عشق کان فيها کل حاجه انا بتمناها...کل تفصيلة و حاجه فيها کأني مختارها
بنفسي....هل هي عشق العوض الي ربنا بعتھولي عن کل الي شفته في حیاتی
و تعبت منه....یارب تكون کده لأني تعبت...في يوم قررت أصرحها

-عشق انا بحبك و بموت فيکي و مقدرش أبعد عنک فعلا

-و أنا کمان حیيتک...بس أنا خایفه

-أنا کمان خایف زیک....خایف انجرح و أجرحک....خایف من الفراق

-و أنا كمان مش عايضة كده
 -طيب و ايه الحل؟!
 -معرفش انا فعلا مش عارفه
 -أنا عندي حل
 -ايه هو؟!
 -نقرب و نتجوز و نشوف و نحاول بكل طاقتنا أنه علاقتنا تنجح....نبذل كل
 جهد عندنا أنه علاقتنا تنجح و تقوم و نكون سوا
 -بس ده هيكون متعب لينا
 -متعب بس هيكون ممتع لأنه بنعمل كل جهدنا علشان حبنا يزيد
 -طيب أنا موافقه
 -تقبلي تتجوزيني
 -بالسرعه دي؟! أنت ملحقتش تعرفني كويس
 -اه بالسرعه دي.....أنا جربت أعرف و اخذ وقتي و الموضوع مكنش نهايته
 كويسه...خليني أجرب المرادي
 -ماشي أنا موافقه برضه
 -اتفقنا يوم الخميس يعني كمان يومين هتكوني مراقي و هنكتب الكتاب.....
 لوحدنا من غير ما يكون حد معنا
 -ياريت نكون لوحدنا.....أنا مش عايضة حد
 -و لا أنا كمان
 -اتفقنا
 جه يوم الخميس كلمت عشق...مبتدش و أتأخرت أنا قلبي أتخلع...فكرتها
 هربت...فكرتها مش عيزاني...بس بعد نص عدت كأنها سنين...لقيت عشق

جت...بسيطة و جميله كالعادة

-كنتي فين أنا قلبي أتخلع و روعي كانت بتطلع مني

-أنا أسفه....كنت عايزة أعرف أي بحبك فعلا و لا لأ....و أهو أديني مقدرتش

و جيت....جتلك أهو

-و هو علشان تتأكدي مترديش عليا و تخليني منهار كده

-بجد أسفه بس أنا كنت عايزة أتأكد

كتبنا الكتاب و أتجوزت أنا و عشق....عشنا أجمل أيام....لحد ما بعد شهرين

من جوازنا....علاقتنا بدأت تبقي ممله...بدأ الملل و حاجات صغيره تعمل

ما بينا تراكمات....تخلي كل واحد قافل علي نفسه من الثاني....بس انا مش

هأسيب عشق....و أنا مش هأسيب فرصه للملل يدخل بينا....في يوم بعد

العشا قعدت أتكلمت معاها

-عشق أحنا بقالنا فتره فيه بينا ملل فيه بينا حاجات مانعه أنه نكون زي الأول

-و أنا كمان حاسه بكده و كنت عايزة اكلمك في الموضوع ده

-طيب خيلنا نتفق اتفاق

-ايه هو؟!

-مفيش أسرار...مناش يوم و أحنا بينا أي مشكله....نكون صحاب قبل ما

نكون متجوزين...زي ما كنا قبل الجواز....مممكن؟!

-اكيد أنا نفسي في ده...بس أنت بعد الجواز حسيتك مبقتش زي زمان حسيتك

بتخبي عليا حسيتك مش عايزني أكون معاك

-ابدا و الله ده انتي الحلم الي كنت بحلم بيه طول حياتي

-و انت كمان انا بحبك اوي

-و انا بعشقك بجد

-بس اوعدي بحاجه

-ايه هي؟!

-مهما كان بينا مشاكل او خلافات او حد فينا غلط خرينا نعاتب بعض و نقول كل حاجه لبعض.....العتب صابون القلوب بيغسلها و يصفها
-و انا موافق و أوعدك بده

و فعلا علاقتنا أغيرت و رجعت زي الأول أنا كنت مرتاح بكده و كنت فرحان بكده جدا....عشق كانت فهماني جدا....كانت فاهمه أرتباطي بسلسه روح و انا مقدرش أقلعها و لا عمرها طلبت أني أقلعها....بجد انا ربنا عوضني بيها..
لأول مره بحس بالسلام النفسي و أنا معايا حد و أنا مش لوحدي...و عشق فعلا كانت النص بتاعي....النص اللي كان تايه مني....يمكن عمري ضاع و انا بدور عليها بس أخيرا لقيتها

كان بالنسبالي حياقي مستقره جدا....و مكنتش عايز حاجه من الدنيا تاني.... حمل عشق أتاخر بقالنا سنتين و مفيش اي حمل حصل و انا مكنتش الموضوع مهم...أنا عشق كانت بالنسبالي مراقي و بنتي كانت كل حاجه....بس الحمد لله..
لأنه ربنا قرر أنه فرحتنا تكمل

و في يوم عشق كلمتني و كانت طايه من الفرح....عشق كانت حامل....أنا مقدرتش امسك دموعي و عيطت و لأول مره....تنزل مني دموع الفرح.... كانت مختلفه عن دموعي قبل كده....حتي الدموع أنواع....و مختلفه...كل دمعه كان ليها احساس غير التاني....دموع الفراق غير الحنين غير الوجد غير الفرحه

عدت شهور الحمل بسرعه....كأنها لمحه من عمري....عشق خلفت....أنا و هي أتصدمنا لأنه كانت حامل في توأم....أزاي مكنتش باين في السونار معرفش.

...بس المهم أن ربنا رزقني بأجمل بنت وولد في الدنيا...فكرنا كثير في أسمهم
انا و عشق....توهنا في الأسامي كثير....بس أتفقنا نسمي الولد يوسف...لكن
البنت مكناش نعرف بس لقيت عشق بتقلي احنا هنسميها روح....أستغربت
و سألتها ليه

-بص أنت عمرك ما هتنساها و عمر روح ما هتروح من بالك و لا أنا هاقدر
أخليك تنساها....حتي لو هي ميتة
-دي غيره؟!

-اه غيرانه حتي لو هي ميتة....بس أنا هأسمي بنتنا بأسمها علشان لولاها
مكنتش قادر تكمل و تحبني و الأقيك...و بعدين أسمها حلو و أنا أتمني بنتي
تكون زيها....أتمني بنتي تبقي فعلا بطيبه قلبها الي أنت حكيت عنها
و فعلا عشت أحلي أيام حياي و ربنا عوضني عن كل حاجه أذتني او جرحتني
و كسرتني....العوض بيكون جميل حتي لو أتاخر....عمري مع عشق كان
عمري الحقيقي

جدي خلص حكاياته ليا....و أنا مكنتش متخيل أنه حياته كان فيها كميّه
الوجع ده و كل الحزن ده.....الحزن الي كان باين عليه أو كنت بحسه مكنش
حاجه من الي هو شافها....بس فضل عندي كذا سؤال في بالي جدي مقالش
عليهم و حبيت أعرفهم....فسألته
-طيب هو أنت مشفتش أروي تاني أو قابلتها؟!

-لأ مشفتهاش و لو كنت شفتها مكنش هأكلمها و لا كأني أعرفها....لأنه علاقتي
بأروي كانت غلطه....كنت لسه مش فاهم الدنيا أوي....كأني كنت لسه بتعلم
العوام و نزلت البحر فطبيعي كنت أغرق....أنا كنت محتاج حد جمبي ساعتها

و هي مكانتش جمبي و لا عملت مجهود حتي علشان تهتم بيا
 -طيب و ورد راحت فين؟!
 -علاقتي بورد متقطعش هي سافرت بعد جوازي بجنه و كل علاقتنا كانت
 اتصالات بس....و هي أتجوزت و كملت حياتها و عرفت أني أستحاله أكون
 جزء من الحياه دي
 -مبتحنلهاش او لسه بتحبها؟!
 -لأ...لأنه ورد لما كنت قدامها مختارنتيش....و سابتني في عز احتياجي ليها
 -طيب و روح بتحبها لسه؟!
 -مقدرش أنسي روح الموضوع مش حب علي قد ما هو أني برد جميل حد عمله
 فيا
 -محلتمتش بيها قبل كده بعد ما ماتت؟!
 -ياه كثير أوقات بتجيلي في الحلم بتكلم معاها....بتسالني علي اخباري....
 بحسها كأنها بتيجي تظمن عليا و تشوفني و تمشي
 -طيب و جنه فين؟!
 -معرفش أي حاجه عنها....هي اعتبرتني جزء من حياتها أو غلطه عايزه تنساها
 و أنا محاولتش أني أسأل عنها او حتي أهتم بأني أعرف عنها أي حاجه علشان
 متضايقش....و كفايه كلام كده علشان جدتك عشق جايه و لو عرفت أني
 كنت بحكيلك الكلام ده مش هتبطل غيره و تضايق....و صدقني يا أبني
 الحب مبيومتش لو بجد حتي لو وصلت التمانين
 الحب بيعيش و موجود أنت بس محتاج تدور عليه كويس و تدور علي
 الي يستاهله بجد....الي يستاهل قلبك الي يكون جنبك وقت ضعفك وقت
 كسرتك وقت حزنك....متعلقش نفسك بأحبال دايبه أو علاقه مكتوب ليها

الفسل....كلنا نستاهل علاقه أحسن تبينا...تقوينا....مش محتاج توصل
لدرجه النضج الي تخليك تحكم علي حاجه بعقلك....لأنه ساعتها هتنسي
قلبك....النضوج الي بجد أنك توازن بين قلبك و عقلك....اوقات يغلبك قلبك
و اوقات يغلبك عقلك



فصلة

للنشر والتوزيع

Fasla Publishing & Distribution

تواصل معنا :

01067000701

E-mail -: Fasla .Pub@Gmail .com

Facebook .Com/Fasla .Pub